

# 大般涅槃经

(三十六卷：第十三卷至第十五卷)

北凉天竺三藏昙无讖译 梵

宋沙门慧严慧观同谢灵运再治



南無本師釋迦牟尼佛

## 说明

本简体校正版《大般涅槃经》(南本)电子书,是根据《乾隆大藏经》大乘涅槃部,第0110部,北凉天竺三藏昙无讖译梵、宋沙门慧严慧观同谢灵运再治《大般涅槃经》(36卷)影印本校正的。标点符号仅供参考。

为了便于读诵,本电子书按顺序每三卷合为一册,共十二册。若每天读一册,可十二天读完。

本电子书是免费结缘品。特此说明。

仁慧草堂

二〇一八年十月

## 目 录

起诵仪 .....	- 1 -
香赞 .....	- 1 -
开经偈 .....	- 1 -
大般涅槃经卷第十三 .....	- 2 -
圣行品第十九之三 .....	- 2 -
大般涅槃经卷第十四 .....	- 30 -
梵行品第二十之一 .....	- 30 -
大般涅槃经卷第十五 .....	- 68 -
梵行品第二十之二 .....	- 68 -
结诵仪 .....	- 102 -
补阙真言 .....	- 102 -
发愿文 .....	- 102 -
回向偈 .....	- 103 -
回向偈 .....	- 103 -
三皈依 .....	- 104 -

## ● 起诵仪

### 香赞

(一遍)

炉香乍爇. 法界蒙薰. 诸佛海会悉遥闻. 随处结祥云. 诚意方殷. 诸佛现全身.

南無香云盖菩萨摩诃萨 (合掌三称)

南無本师释迦牟尼佛 (合掌三称)

### 开经偈

(一遍)

无上甚深微妙法 百千万劫难遭遇  
我今见闻得受持 愿解如来真实义

# 大般涅槃经卷第十三

北凉天竺三藏昙无讖译 梵

宋沙门慧严慧观同谢灵运再治

## 圣行品第十九之三<sup>1</sup>

“善男子，我观诸行悉皆无常。云何知耶？以因缘故。若有诸法从缘生者，则知无常。是诸外道，无有一法不从缘生。善男子，佛性无生无灭，无去无来，非过去、非未来、非现在，非因所作、非无因作，非作、非作者，非相非无相，非有名非无名，非名非色，非长非短，非阴、界、入之所摄持，是故名常。善男子，佛性即是如来，如来即是法，法即是常。善男子，常者即是如来，如来即是僧，僧即是常。以是义故，从因生法不名为常。是诸外道，无有一法不从因生。善男子，是诸外道不见佛性、如来及法，是故外道所可言说，悉是妄语，无有真谛。诸凡夫人，先见瓶、衣、车乘、舍宅、城郭、河水、山林、男女、象马牛羊，后见相似，便言是常。当知其实，非是常也。

<sup>1</sup> 大正藏：圣行品第十九之下

“善男子，一切有为皆是无常。虚空无为，是故为常；佛性无为，是故为常。虚空者，即是佛性；佛性者，即是如来；如来者，即是为无为；无为者，即是常。常者，即是法；法者，即是僧；僧即无为；无为者，即是常。

“善男子，有为之法凡有二种：色法、非色法。非色法者，心、心数法；色法者，地、水、火、风。善男子，心名无常。何以故？性是攀缘，相应分别故。善男子，眼识性异乃至意识性异，是故无常。善男子，色境界异乃至法境界异，是故无常。善男子，眼识相应异乃至意识相应异，是故无常。善男子，心若常者，眼识应独缘一切法。善男子，若眼识异乃至意识异，则知无常。以法相似，念念生灭，凡夫见已，计之为常。善男子，诸因缘相可破坏故，亦名无常。所谓因眼、因色、因明、因思惟生于眼识，耳识生时，所因各异，非眼识因缘；乃至意识异亦如是。

“复次，善男子，坏诸行因缘异故<sup>2</sup>，心名无常。所谓修无常心异，修苦、空、无我心异。心若常者，应常修无常，尚不得观苦、空、无我，

<sup>2</sup> 大正藏：坏诸行因缘异故；永乐北藏及龙藏：坏诸行因缘故

况复得观常、乐、净、我<sup>3</sup>？以是义故，外道法中，不能摄取常、乐、净、我<sup>4</sup>。善男子，当知心法必定无常。

“复次，善男子，心性异故，名为无常，所谓声闻心性异、缘觉心性异、诸佛心性异。一切外道心有三种：一者，出家心；二者，在家心；三者，在家远<sup>5</sup>离心。乐相应心异、苦相应心异、不苦不乐相应心异、贪欲相应心异、瞋恚相应心异、愚痴相应心异。一切外道心相亦异，所谓愚痴相应心异、疑惑相应心异、邪见相应心异，进止威仪其心亦异。

“善男子，心若常者，亦复不能分别诸色，所谓青、黄、赤、白、紫色。善男子，心若常者，诸忆念法不应忘失。善男子，心若常者，凡所读诵不应增长。复次，善男子，心若常者，不应说言已作、今作、当作。若有已作、今作、当作，当知是心必定无常。善男子，心若常者，则无怨亲、非怨、非亲。心若常者，则不应言我物他物、若死若生。心若常者，虽有所作，不应增长。善男子，以是义故，当知心性各各别异。有别异故，

<sup>3</sup> 大正藏：常、乐、我、净

<sup>4</sup> 大正藏：常、乐、我、净

<sup>5</sup> 大正藏：远；永乐北藏及龙藏：违

当知无常。

“善男子，我今于此非色法中演说无常，其义已显，复当为汝说色无常。是色无常，本无有生，生已灭故。内身处胎歌罗逻时，本无有生，生已变故；外诸<sup>6</sup>牙茎，本亦无生，生已变故；是故当知，一切色法悉皆无常。

“善男子，所有内色随时而变，歌罗逻时异、安浮陀时异、伽那时异、闭手时异、诸胞<sup>7</sup>时异、初生时异、婴孩时异、童子时异，乃至老时各各变异。所谓<sup>8</sup>外色亦复如是，牙异、茎异、枝异、叶异、华异、果异。复次，善男子，内味亦异，歌罗逻时乃至老时，各各变异。外味亦尔，牙、茎、枝、叶、华、果味异。歌罗逻时力异，乃至老时力异。歌罗逻时状貌异，乃至老时状貌亦异。歌罗逻时果报异，乃至老时果报亦异。歌罗逻时名字异，乃至老时名字亦异。所谓内色，坏已还合，故知无常。外诸<sup>9</sup>树木，亦坏已还合，故知无常。次第渐生，故知无常。次第生歌罗逻时乃至老时，次第生牙乃至果子，故知无常。诸色可灭，故知无常。歌罗逻灭时异，乃至老灭时异。

<sup>6</sup> 大正藏：诸；永乐北藏及龙藏：之

<sup>7</sup> 大正藏：疱

<sup>8</sup> 大正藏：有

<sup>9</sup> 大正藏：诸；永乐北藏及龙藏：之

芽<sup>10</sup>灭时异乃至果灭时异，故知无常。凡夫无知<sup>11</sup>，见相似生，计以为常。以是义故，名曰无常。若无常即是苦，若苦即是不净。

“善男子，我因迦叶先<sup>12</sup>问是事，于彼已答。

“复次，善男子，诸行无我。善男子，总一切法谓色、非色。色非我也。何以故？可破、可坏、可打、可裂<sup>13</sup>、生增长故。我者，不可破、坏、打、裂<sup>14</sup>、生长。以是义故，知色非我。非色之法亦复非我。何以故？因缘生故。

“善男子，若诸外道以专念故知有我者，专念之性实非我也。若以专念为我性者，过去之事则有忘失，有忘失故定知无我。

“善男子，若诸外道以忆想故知有我者，无忆想故定知无我。如说见人手有六指，即便<sup>15</sup>问言：‘我先何处共相见耶？’若有我者，不应复问；以相问故，定知无我。

“善男子，若诸外道以有遮故知有我者<sup>16</sup>，善男子，以有遮故定知无我。如言调达，终不发

<sup>10</sup> 大正藏：牙

<sup>11</sup> 大正藏：智

<sup>12</sup> 大正藏：先；永乐北藏及龙藏：上

<sup>13</sup> 大正藏：可破、可坏、可裂、可折

<sup>14</sup> 大正藏：破、坏、裂、折

<sup>15</sup> 大正藏：便；永乐北藏及龙藏：复

<sup>16</sup> 大正藏：若诸外道以有遮故知有我者；永乐北藏及龙藏：若诸外道以遮故知有我者

言非调达也。我亦如是，若定是我，终不遮我；以遮我故，定知无我。若以遮故知有我者，汝今不遮，定应无我。

“善男子，若诸外道，以伴非伴知有我者，以无伴故，应无有我。有法无伴，所谓如来、虚空、佛性；我亦如是，实无有伴。以是义故，定知无我。

“复次，善男子，若诸外道以名字故知有我者，无我法中亦有我名。如贫贱人，名字富贵。如言我死，若我死者，我则杀我，而我实不可杀，假名杀我。亦如矧<sup>17</sup>人，名为长者。以是义故，定知无我。

“复次，善男子，若诸外道以生已求乳知有我者。善男子，若有我者，一切婴儿不应执持糞秽<sup>18</sup>、火、蛇、毒药。以是义故，定知无我。

“复次，善男子，一切众生于三法中，悉有等智，所谓淫欲、饮食、恐怖，是故无我。

“复次，善男子，若诸外道以相貌故知有我者。善男子，相故无我，无相故亦无我。若人睡时，不能进止、俯仰、视眴、不觉苦乐，不应有

<sup>17</sup> 大正藏：短

<sup>18</sup> 大正藏：糞秽；永乐北藏及龙藏：不净

我。若以进止、俯仰、视眴知有我者，机关木人亦应有我。善男子，如来亦尔，不进不止、不俯不仰、不视不眴、不苦不乐、不贪不恚、不痴不行，如来如是真实有我。

“复次，善男子，若诸外道以见他食果口中生涎知有我者。善男子，以忆念故，见则生涎，涎非我也，我亦非涎、非喜非悲，非哭非笑，非卧<sup>19</sup>非起，非饥非饱，以是义故，定知无我。

“善男子，是诸外道痴如小儿，无慧方便，不能了达常与无常，苦、乐，净、不净，我、无我，寿命、非寿命，众生、非众生，实、非实，有、非有。于佛法中取少许分，虚妄计有常、乐、净、我<sup>20</sup>，而实不知常、乐、净、我<sup>21</sup>。如生盲人不识乳色，便问他言：‘乳色何似？’他人答言：‘色白如贝。’盲人复问：‘是乳色者，如贝声耶？’答言：‘不也。’复问：‘贝色为何似耶？’答言：‘如稻米糝<sup>22</sup>。’盲人复问：‘乳色柔软如稻米糝耶？稻米糝<sup>23</sup>者复何所似？’答言：‘如雪<sup>24</sup>。’盲人复言：‘彼稻米糝冷如雪耶？雪复何似？’答

<sup>19</sup> 大正藏：卧；永乐北藏及龙藏：墮

<sup>20</sup> 大正藏：常、乐、我、净

<sup>21</sup> 大正藏：常、乐、我、净

<sup>22</sup> 大正藏：犹稻米末

<sup>23</sup> 大正藏：末

<sup>24</sup> 大正藏：如雨雪犹

言：‘犹如白鹤。’是生盲人虽闻如是四种譬喻，终不能得识乳真色。是诸外道亦复如是，终不能识常、乐、净、我<sup>25</sup>。善男子，以是义故，我佛法中有真实谛，非于外道。”

文殊师利白佛言：“希有！世尊！如来于今临般涅槃，方复更转无上法轮<sup>26</sup>，乃作如是分别真谛。”

佛告文殊师利：“汝今云何故于如来生涅槃想？善男子，如来实是常住不变，不般涅槃。善男子，若有计：‘我是佛，我成阿耨多罗三藐三菩提。我即是法，法是我所。我即是道，道是我所。我即世尊，世尊即是我所。我即声闻，声闻即是我所。我能说法，令他听受。我转法轮，余人不能。’如来终不作如是计，是故，如来不转法轮。”

“善男子，若有人作如是妄计：‘我即是眼，眼即是我所；耳、鼻、舌、身、意亦复如是。我即是色，色是我所；乃至法亦如是。我即是地，地即我所<sup>27</sup>；水、火、风亦如是<sup>28</sup>。’善男子，若

<sup>25</sup> 大正藏：常、乐、我、净

<sup>26</sup> 大正藏：方更转于无上法轮

<sup>27</sup> 大正藏：地即是我所

<sup>28</sup> 大正藏：水、火、风等亦复如是

人计言<sup>29</sup>：‘我即是信，信是我所。我是多闻，多闻即是我所。我是檀波罗蜜，檀波罗蜜即是我所。我是尸波罗蜜，尸波罗蜜即是我所。我是羸提波罗蜜，羸提波罗蜜即是我所。我是毗梨耶波罗蜜，毗梨耶波罗蜜即是我所。我是禅波罗蜜，禅波罗蜜即是我所。我是般若波罗蜜，般若波罗蜜即是我所。我是四念处，四念处即是我所。四正勤、四如意足、五根、五力、七觉分、八圣道分亦复如是。’善男子，如来终不作如是计。是故，如来不转法轮。

“善男子，若言常住无有变易，云何说言佛转法轮？是故，汝今不应说言：‘如来方便转于<sup>30</sup>法轮。’

“善男子，譬如因眼缘色、缘明、缘思惟，因缘和合得生眼识。善男子，眼不念言：‘我能生识。’色乃至思惟终不念言：‘我生眼识。’眼识亦复不作念言：‘我能自生。’善男子，如是等法，因缘和合，得名为见。善男子，如来亦尔，因六波罗蜜和合得名为见<sup>31</sup>。善男子，如来亦尔，

<sup>29</sup> 大正藏：若有人言

<sup>30</sup> 大正藏：于；永乐北藏及龙藏：上

<sup>31</sup> “善男子，如来亦尔，因六波罗蜜和合得名为见”句，大正藏无；永乐北藏及龙藏有。按上下句义，并比较“北本”，此句应是谬作，应剔除。

因六波罗蜜、三十七助菩提法<sup>32</sup>，觉了诸法。复因咽、喉、舌、齿、唇、口、言语、音声，为憍陈如初始说法，名转法轮。以是义故，如来不名转法轮也。善男子，若不转者即名为法，法即如来。

“善男子，譬如因燧、因钻、因手、因干秋草<sup>33</sup>而得生火。燧亦不言：‘我能生火。’钻、手、干草<sup>34</sup>各不念言：‘我能生火。’火亦不言：‘我能自生。’如来亦尔，因六波罗蜜乃至憍陈如名转法轮，如来亦复不生念言：‘我转法轮。’善男子，若不生者，是则名为转正法轮，是转法轮即名如来。

“善男子，譬如因酪、因水、因钻<sup>35</sup>、因瓶、因绳、因人手捉而得出酥。酪不念言：‘我能出酥。’乃至人手亦不念言：‘我能出酥。’酥亦不言：‘我能自出。’众缘和合，故得出酥。如来亦尔，终不念言：‘我转法轮。’善男子，若不出者，是则名为转正法轮，是转法轮即是如来。

“善男子，譬如因子及地、水、火、风、沃

<sup>32</sup> 大正藏：三十七助菩提之法

<sup>33</sup> 大正藏：因干牛粪

<sup>34</sup> 大正藏：钻、手、牛粪

<sup>35</sup> 大正藏：攢

壤、时节<sup>36</sup>，因人作业，而牙<sup>37</sup>得生。善男子，子亦不言：‘我能生牙。’乃至作业亦不念言：‘我能生牙。’牙亦不言：‘我能自生。’如来亦尔，终不念言：‘我转法轮。’善男子，若不作者，是则名为转正法轮，是转法轮即是如来。

“善男子，譬如因鼓、因空、因皮、因人、因桴和合出声。鼓不念言：‘我能出声。’乃至桴亦如是。声亦不言：‘我能自生。’善男子，如来亦尔，终不念言：‘我转法轮。’善男子，转法轮者名为不作，不作者即转法轮，转法轮者即是如来。善男子，转法轮者乃是诸佛世尊境界，非诸声、闻缘觉所知。

“善男子，虚空非生非出、非作非造、非有为法。如来亦尔，非生非出，非作非造，非有为法。如如来性，佛性亦尔，非生非出，非作非造，非有为法。

“善男子，诸佛世尊语有二种：一者，世语；二者<sup>38</sup>，出世语。善男子，如来为诸声闻、缘觉说于世语，为诸菩萨说出世语。

“善男子，是诸大众复有二种：一者，求小

<sup>36</sup> 大正藏：善男子，譬如因子、因地、因水、因火、因风、因粪、因时

<sup>37</sup> 大正藏：芽

<sup>38</sup> 大正藏：二

乘；二者，求大乘。我于昔日波罗柰<sup>39</sup>城为诸声闻转于法轮，今始于此拘尸那城为诸菩萨转大法轮。

“复次，善男子，复有二人：中根、上根。为中根人，于波罗柰，转于法轮；为上根人，人中象王迦叶菩萨等，今于此间拘尸那城，转大法轮。善男子，极下根者，如来终不为转法轮，极下根者，即一阐提。

“复次，善男子，求佛道者复有二种：一，中精进；二，上精进。于波罗柰为中精进转于法轮，今于此城<sup>40</sup>为上精进转大法轮。

“复次，善男子，我昔于彼波罗柰城初转法轮，八万天人得须陀洹果；今于此城<sup>41</sup>，八十万亿人不退转于阿耨多罗三藐三菩提。

“复次，善男子，波罗柰城，大梵天王稽首请我转于法轮；今于此城<sup>42</sup>，迦叶菩萨稽首请我转大法轮。

“复次，善男子，我昔于彼波罗柰城转法轮时，演说无常、苦、空、无我<sup>43</sup>；今于此城<sup>44</sup>转

<sup>39</sup> 大正藏：柰

<sup>40</sup> 大正藏：今于此间拘尸那城

<sup>41</sup> 大正藏：今于此间拘尸那城

<sup>42</sup> 大正藏：今于此间拘尸那城

<sup>43</sup> 大正藏：…转法轮时，说无常、苦、空、无我

<sup>44</sup> 大正藏：今于此间拘尸那城

法轮时，如实演畅常、乐、我、净。

“复次，善男子，我昔于彼波罗柰<sup>45</sup>城转法轮时，所出音声闻于梵天；如来今于拘尸那城转法轮时，所出音声遍于<sup>46</sup>东方二十恒河沙等诸佛世界，南西北方，四维上下亦复如是。

“复次，善男子，诸佛世尊凡有所说，皆悉名为转法轮也。善男子，譬如圣王所有轮宝，未降伏者能令降伏，已降伏者能令安隐。善男子，诸佛世尊凡所说法亦复如是，无量烦恼未调伏者能令调伏，已调伏者令生善根。

“善男子，譬如圣王所有轮宝，则能消灭一切怨贼。如来演法亦复如是，能令一切诸烦恼贼皆悉寂静。

“复次，善男子，譬如圣王所有轮宝，下上<sup>47</sup>回转；如来说法亦复如是，能令下趣诸恶众生上生人、天，乃至佛道。

“善男子，是故，汝今不应赞言：‘如来于此更转法轮。’”

尔时，文殊师利白佛言：“世尊！我于此义非为不知，所以问者，为欲利益诸众生故。世尊！”

<sup>45</sup> 大正藏：捺

<sup>46</sup> 大正藏：于

<sup>47</sup> 大正藏：上下

我已久知转法轮者，实是诸佛如来境界，非是声闻、缘觉所及。”

尔时，世尊告迦叶菩萨：“善男子，是名菩萨住于大乘大涅槃经所行圣行。”

迦叶菩萨白佛言：“世尊！复以何义名为圣行？”

“善男子，圣名诸佛世尊，以是义故，名为圣行。”

“世尊！若是诸佛之所行者，则非声闻、缘觉、菩萨所能修行。”

“善男子，是诸世尊安住于此大般涅槃，而作如是开示，分别演说其义，以是义故，名曰圣行。声闻、缘觉及诸菩萨，如是闻已则能奉行，故名圣行。

“善男子，是菩萨摩訶萨得是行已，则得住于无所畏地。善男子，若有菩萨得住如是无所畏地，则不复畏贪恚愚痴、生老病死，亦复不畏恶道、地狱、畜生、饿鬼。

“善男子，恶有二种：一者，阿修罗；二者，人中。人中有三种恶：一者，一阐提；二者，诽谤方等经典；三者，犯四重禁。善男子，住是地中诸菩萨等，终不畏堕如是恶中，亦复不畏沙门、

婆罗门、外道邪见、天魔波旬，亦复不畏受二十五有。是故，此地名无所畏。

“善男子，菩萨摩訶萨住无畏地，得二十五三昧，坏二十五有。善男子，得无垢三昧能坏地狱有，得无退三昧能坏畜生有，得心乐三昧能坏饿鬼有，得欢喜三昧能坏阿修罗有，得日光三昧能断弗婆提有，得月光三昧能断瞿耶尼有，得热焰<sup>48</sup>三昧能断郁单越有，得如幻三昧能断阎浮提有，得一切法不动三昧能断四天处有，得难伏三昧能断三十三天处有，得悦意三昧能断炎摩天有，得青色三昧能断兜术<sup>49</sup>天有，得黄色三昧能断化乐天有，得赤色三昧能断他化自在天有，得白色三昧能断初禅有，得种种三昧能断大梵王有，得双三昧能断二禅有，得雷音三昧能断三禅有，得澍雨三昧能断四禅有，得如虚空三昧能断无想有，得照镜三昧能断净居阿那含有，得无阂<sup>50</sup>三昧能断空处有，得常三昧能断识处有，得乐三昧能断不用处有，得我三昧能断非想非非想处有。善男子，是名菩萨得二十五三昧，断二十五有。

“善男子，如是二十五三昧，名诸三昧王。

<sup>48</sup> 大正藏：炎

<sup>49</sup> 大正藏：率

<sup>50</sup> 大正藏：碍

善男子，菩萨摩訶萨入如是等诸三昧王，若欲吹坏须弥山王，随意即能。欲知三千大千世界所有众生心之所念，亦悉能知。欲以三千大千世界所有众生，内于己身一毛孔中，随意即能，亦令众生无迫迮想。若欲化作无量众生，悉令充满三千大千世界中者，亦能随意。能<sup>51</sup>分一身以为多身、复合多身以为一身，虽作如是，心无所著，犹如莲华。

“善男子，菩萨摩訶萨得入如是三昧王已，即得住于自在之地。菩萨住是自在地者<sup>52</sup>，得自在力，随欲生处即得往生。

“善男子，譬如圣王领四天下，随意所行，无能障阂。菩萨摩訶萨亦复如是，一切生处，若欲生者，随意往生。

“善男子，菩萨摩訶萨若见地狱一切众生有可化令住善根者，菩萨即时往生其中<sup>53</sup>。菩萨虽生，非本业果，菩萨摩訶萨住自在地力因缘故而生其中。善男子，菩萨摩訶萨虽在地狱，不受炽然碎身等苦。善男子，菩萨摩訶萨所可成就如是功德无量无边，百千万亿尚不可说，何况诸佛所

<sup>51</sup> 大正藏：欲

<sup>52</sup> 大正藏：菩萨得住是自在地

<sup>53</sup> 大正藏：菩萨即往而生其中

有功德而当可说？”

尔时，众中有一菩萨，名住<sup>54</sup>无垢藏王，有大威德，成就神通，得大总持，三昧具足，得无所畏，即从座起，偏袒右肩，右膝著地，长跪合掌白佛言：“世尊！如佛所说：‘诸佛菩萨所可成就功德智慧无量无边，百千万亿实不可说。’我意犹谓：‘故不如是大乘经典。’何以故？因是大乘方等经力故，能出生诸佛世尊阿耨多罗三藐三菩提。”

时佛赞言：“善哉！善哉！善男子，如是如是，如汝所说。是诸大乘方等经典虽复成就无量功德，欲比是经不得为喻，百倍、千倍、百千万倍<sup>55</sup>，乃至算数譬喻所不能及。

“善男子，譬如从牛出乳，从乳出酪，从酪出生酥，从生酥出熟酥，从熟酥出醍醐。醍醐最上，若有服者众病皆除，所有诸药悉入其中。善男子，佛亦如是，从佛出十二部经<sup>56</sup>，从十二部经出修多罗，从修多罗出方等经，从方等经出般若波罗蜜，从般若波罗蜜出大涅槃，犹如醍醐。言醍醐者，喻于佛性，佛性者即是如来。善男子，

<sup>54</sup> 大正藏：曰

<sup>55</sup> 大正藏：百千万亿倍

<sup>56</sup> 大正藏：从佛出生十二部经

以是义故，说言如来所有功德无量无边不可称计。”

迦叶菩萨白佛言：“世尊！如佛所赞：‘大涅槃经犹如醍醐，最上最妙。若有能服，众病悉除，一切诸药悉入其中。’我闻是已，窃复思念：‘若有不能听受是经，当知是人为大愚痴，无有善心。’世尊！我于今者，实能堪忍剥皮为纸，刺血为墨，以髓为水，析<sup>57</sup>骨为笔，书写如是大涅槃经。书已读诵，令其通利，然后为人广说其义。世尊！若有众生，贪著财物，我当施财，然后以是大涅槃经劝之令读。若尊贵者，先以爱语随顺其意<sup>58</sup>，然后渐当以是大乘大涅槃经劝之令读。若凡庶者，当以威势逼之令读。若憍慢者，为作仆使<sup>59</sup>，随顺其意，令其欢喜，然后复以大涅槃经而教导之<sup>60</sup>。若有诽谤方等<sup>61</sup>经者，当以势力摧之令伏；既摧伏已，然后劝令读大涅槃。若有爱乐大乘经者，我当躬<sup>62</sup>往恭敬、供养、尊重、赞叹。”

尔时，佛赞迦叶菩萨：“善哉！善哉！汝甚

<sup>57</sup> 大正藏：折

<sup>58</sup> 大正藏：先以爱语而随其意

<sup>59</sup> 大正藏：若憍慢者，我当为其而作仆使

<sup>60</sup> 大正藏：然后当以大般涅槃而教导之

<sup>61</sup> 大正藏：若有诽谤大乘

<sup>62</sup> 大正藏：我躬当

爱乐大乘经典、贪大乘经、爱<sup>63</sup>大乘经、味大乘经，信敬、尊重、供养大乘。善男子，汝今以此善心因缘，当得超越无量无边恒河沙等大菩萨前成<sup>64</sup>阿耨多罗三藐三菩提。汝亦不久复当如我广为大众演说如是大般涅槃，如来佛性，诸佛所说，秘密之藏。

“善男子，乃昔过去<sup>65</sup>佛日未出，我于尔时，作婆罗门，修菩萨行，悉能通达一切外道所有经论，修寂灭行，具足威仪，其心清净，不为外来能生欲想之所破坏，灭瞋恚火，受持常、乐、我、净之法，周遍求索大乘经典，乃至不闻方等名字。我于尔时，住于雪山，其山清净，流泉、浴池、树林、药木充满其地，处处石间有清流水，多诸香华周遍严饰，众鸟群<sup>66</sup>兽不可称计，甘果滋繁种别难计，复有无量藕根、甘根、青木香根。我于尔时，独处其中，唯食诸果，食已系心思惟坐禅，经无量岁，亦不闻有如来出世大乘经名。

“善男子，我修如是难行苦行时<sup>67</sup>，彼帝释诸天人等，心大惊怪<sup>68</sup>，即共集会，各各相谓而

<sup>63</sup> 大正藏：受

<sup>64</sup> 大正藏：当得超越无量无边恒河沙等诸大菩萨，在前得成

<sup>65</sup> 大正藏：善男子，过去之世

<sup>66</sup> 大正藏：禽

<sup>67</sup> 大正藏：我修如是苦、难行时

<sup>68</sup> 大正藏：释提桓因等诸天人，心大惊怪

说偈言：

各各<sup>69</sup>相指示 清静雪山中  
寂静离欲主 功德庄严王  
已<sup>70</sup>离贪瞋慢 永<sup>71</sup>断谄<sup>72</sup>愚痴  
口初未曾说 粗恶等语言

“尔时，众中有一天子，名曰欢喜，复说偈言：

如是离欲人 清静勤精进  
将不求帝释 及以诸天耶  
若是求道者 修行诸苦行  
是人多欲求 帝释所坐处

“尔时，复有一仙天子，即为帝释而说偈言：

天主憍尸迦 不应生是<sup>73</sup>虑  
外道修苦行 何必求帝处

“说是偈已，复作是言：‘憍尸迦，世有大士，为众生故，不贪己身，为欲利益诸众生故，而修种种无量苦行。如是之人，见生死中诸过咎故，设见珍宝满此大地诸山、大海，不生贪著，如视涕唾。如是大士，舍弃财宝、所爱妻子、头

<sup>69</sup> 大正藏：共

<sup>70</sup> 大正藏：以

<sup>71</sup> 大正藏：永；永乐北藏及龙藏：未

<sup>72</sup> 大正藏：诸

<sup>73</sup> 大正藏：此

目髓脑、手足支节、所居舍宅、象马车乘、奴婢童<sup>74</sup>仆，亦不愿求生于天上，唯愿一切得受快乐<sup>75</sup>。如我所解，如是大士，清净无染，众结永尽，唯欲志求<sup>76</sup>阿耨多罗三藐三菩提。’

“释提桓因复作是言：‘如汝言者，是人则为摄取一切世间众生。大仙！若此世间有佛树者，能除一切梵<sup>77</sup>天、世人及阿修罗烦恼毒蛇。若<sup>78</sup>诸众生住是佛树阴凉中者，烦恼诸毒悉得消灭。大仙！是人若当未来世中作善逝者，我等悉当得灭无量炽然烦恼。如是之事实为难信，何以故？无量众生发<sup>79</sup>阿耨多罗三藐三菩提心，见少微缘，于阿耨多罗三藐三菩提即便动转。如水中月，水动则动；犹如画像，难成易坏。菩提之心亦复如是，难发易坏。大仙！如有多人，以诸铠仗牢自庄严，欲前讨贼，临阵恐怖，则便退散。无量众生亦复如是，发菩提心牢自庄严，见生死过，心生恐怖，即便退散。大仙！我见如是无量众生发心之后，皆生动转。是故，我今虽见是人专修苦

<sup>74</sup> 大正藏：僮

<sup>75</sup> 大正藏：唯求欲令一切众生得受快乐

<sup>76</sup> 大正藏：唯欲求于

<sup>77</sup> 大正藏：诸

<sup>78</sup> 大正藏：是

<sup>79</sup> 大正藏：何以故？百千诸众生等发于

行<sup>80</sup>，无恼无热，住于险道<sup>81</sup>，其行清净，未能信也。我今要当自往试之，知其实能堪任荷负阿耨多罗三藐三菩提大重担不？

“‘大仙！犹如车有二轮，则有<sup>82</sup>载用；鸟有二翼，堪任飞行。是苦行者亦复如是，我虽见其坚持禁戒，未知其人有深智不？若有深智，当知则能堪任荷负阿耨多罗三藐三菩提之重担也。大仙！譬如鱼母，多有胎子，成就者鲜<sup>83</sup>；如菴罗树，华多果少。众生发心，乃有无量，及其成就少不足言。大仙！我当与汝俱往试之。大仙！譬如真金，三种试已，乃知其真，谓烧、打、磨。试彼苦行，亦当如是<sup>84</sup>。’

“尔时，释提桓因自变其身作罗刹像，形甚可畏，下至雪山，去其不远，而便立住。是时，罗刹心无所畏，勇健难当，辩才次第，其声清雅，宣过去佛所说半偈：

诸行无常 是生灭法

“说是半偈已，便住其前，所现形貌，甚可怖畏，顾眄遍视观于四方。

<sup>80</sup> 大正藏：我今虽见是人修于苦行

<sup>81</sup> 大正藏：住于险道；永乐北藏及龙藏：住于道检

<sup>82</sup> 大正藏：能

<sup>83</sup> 大正藏：少

<sup>84</sup> 大正藏：试彼苦行者亦当如是

“是苦行者，闻是半偈，心生欢喜。譬如贾<sup>85</sup>客，于险难处，夜行失伴，恐怖推索，还遇同侣，心生欢喜，踊跃无量；亦如久病，未遇良医，瞻病好药，后卒得之；如人没海，卒遇船舫；如渴乏人，遇清冷水；如为怨逐，忽然得脱；如久系狱<sup>86</sup>，卒闻得出；亦如农夫，炎旱得<sup>87</sup>雨；亦如行人，还得归家，家人见已，生大欢喜。

“善男子，我于尔时，闻是半偈，心中欢喜，亦复如是。即从座起，以手举发，四向顾视而作是语<sup>88</sup>：‘向所闻偈，谁之所说？’尔时，四顾<sup>89</sup>不见余人，唯见罗刹，即说是言：‘谁开如是解脱之门？谁能雷震诸佛音声？谁于生死睡眠之中而独觉寤，唱如是言？谁能于此示导<sup>90</sup>生死饥馑众生无上道味？无量众生沈生死海，谁能于中作大船师？是诸众生，常为烦恼重病所缠，谁能于中为作良医？说是半偈启悟我心，犹如半月渐开莲华。’

“善男子，我于是<sup>91</sup>时，更无所见，唯见罗

<sup>85</sup> 大正藏：估

<sup>86</sup> 大正藏：人

<sup>87</sup> 大正藏：值

<sup>88</sup> 大正藏：四向顾视而说是言

<sup>89</sup> 大正藏：尔时，亦更

<sup>90</sup> 大正藏：道

<sup>91</sup> 大正藏：尔

刹，复作是念：‘将是罗刹说是偈耶？’覆复生疑：‘或非其说<sup>92</sup>？何以故？是人形容甚可怖畏。若有得闻是偈句者，一切恐怖丑陋即除，何有此人形貌如是能说此偈？不应火中出生<sup>93</sup>莲华，非日光中出生冷水。’

“善男子，我于尔时，复作是念：‘我今无智，而此罗刹或能得见过去诸佛，从诸佛所闻是半偈，我今当问。’即便前至是罗刹所，作如是言：‘善哉！大士！汝于何处得是过去离怖畏者所说半偈？大士！汝<sup>94</sup>于何处而得如是半如意珠？大士！是半偈义乃是过去、未来、现在诸佛世尊之正道也。一切世间无量众生，常为诸见罗网所覆，终身于此外道法中，初不得闻如是出世十力世雄所说空义。’

“善男子，我问<sup>95</sup>是已，即答我言：‘大婆罗门，汝今不应问我是义，何以故？我不食来已经多日，处处求索了不能得，饥渴苦恼，心乱谬语，非我本心之所知也。我今力能飞行虚空，至郁单越乃至天上，处处求食而<sup>96</sup>不能得，以是之<sup>97</sup>故，

<sup>92</sup> 大正藏：覆生疑惑：“非其说耶？”

<sup>93</sup> 大正藏：于

<sup>94</sup> 大正藏：复

<sup>95</sup> 大正藏：闻

<sup>96</sup> 大正藏：亦

<sup>97</sup> 大正藏：义

我说是语。’

“善男子，我时即复语罗刹言：‘大士！若能为我说是偈竟，我当终身为汝弟子。大士！汝所说者，名字不终，义亦不尽。以何因缘不欲说耶？夫财施者，则有竭尽，法施因缘不可尽也。法施无尽，多所利益。我今闻此半偈法已，心生惊疑。汝今幸可为我除断，说此偈竟，我当终身为汝弟子。’罗刹答言：‘汝智太过，但自爱<sup>98</sup>身，都不见念今我定为饥苦所逼，实不能说。’我即问言：‘汝所食者，为是何物？’罗刹答言：‘汝不足问，我若说者，令人多<sup>99</sup>怖。’我复语<sup>100</sup>言：‘此中独处，更无有人，我不畏汝，何故不说？’罗刹答言：‘我所食者，唯人暖肉；其所饮者，唯人热血。自我薄福，唯食此食，周遍求索，困不能得。世虽多人，皆有福德，兼为诸天之所守护，而我无力，不能得杀。’

“善男子，我复语言：‘汝但具足说是半偈，我闻偈已，当以此身奉施供养。大士！我设命终，如此之身无所复用，当为虎、狼、鸱<sup>101</sup>、枭、鷗、

<sup>98</sup> 大正藏：忧

<sup>99</sup> 大正藏：多人

<sup>100</sup> 大正藏：问

<sup>101</sup> 大正藏：鷄

鷲之所啖食，而<sup>102</sup>复不得一毫之福。我今为求阿耨多罗三藐三菩提，舍不坚身以易坚身。’罗刹答言：‘谁当信汝如是之言，为八字故，弃所爱身？’

“善男子，我即答言：‘汝真无智。譬如有人，施他瓦器得七宝器。我亦如是，舍不坚身得金刚身。汝言：“谁当信者？”我今有证，大梵天王、释提桓因及四天王能证是事，复有天眼诸菩萨等，为欲利益无量众生，修行大乘具六度者，亦能证知，复有十方诸佛世尊利众生者，亦能证我为八字故，舍是<sup>103</sup>身命。’罗刹复言：‘汝若如是能舍身者，谛听谛听，当为汝说其余半偈。’

“善男子，我于尔时，闻是语<sup>104</sup>已，心中欢喜，即解己身所著鹿皮，为此罗刹敷置法座，白言：‘和上！愿坐此座。’我即于前，叉手长跪，而作是言：‘惟愿和上，善为我说其余半偈，令得具足。’罗刹即说：

生灭灭已 寂灭为乐

“尔时，罗刹说是偈已，复作是言：‘菩萨摩訶萨！汝今已闻具足偈义，汝之所愿为悉满足。

<sup>102</sup> 大正藏：然

<sup>103</sup> 大正藏：于

<sup>104</sup> 大正藏：事

若必欲利诸众生者，时施我身。’

“善男子，我于尔时，深思此义，然后处处若石、若壁、若树、若道书写此偈，即便更系所著衣裳，恐于<sup>105</sup>死后身体露现，即上高树。尔时，树神复问我言：‘善哉！仁者！欲作何事！’

“善男子，我时答言：‘我欲舍身以报偈价。’树神又<sup>106</sup>言：‘如是偈者何所利益？’我时答言：‘如是偈句，乃是过去、未来、现在诸佛所说开空法道，我为此法弃舍身命，不为利养、名闻、财宝、转轮圣王、四大天王、释提桓因、大梵天王、人天中乐，为欲利益一切众生，故舍此身。’

“善男子，我舍身时，复作是愿<sup>107</sup>：‘愿令一切慳惜之人，悉来见我舍离此身。若有少施、起贡高者，亦令得见我为一偈舍此身命，如弃草木。’我于尔时，说是语已，寻即放身，自投树下。下未至地，时虚空中出种种声<sup>108</sup>，其声乃至阿迦尼吒。尔时，罗刹还复释形<sup>109</sup>，即于空中接取我身，安置平地。

“尔时，释提桓因及诸天、大梵天王，稽

<sup>105</sup> 大正藏：其

<sup>106</sup> 大正藏：问

<sup>107</sup> 大正藏：言

<sup>108</sup> 大正藏：虚空之中出种种声

<sup>109</sup> 大正藏：身

首顶礼于我足下，赞言：‘善哉！善哉！真是菩萨！能大利益无量众生，欲于无明黑闇之中然大法炬。由我爱惜如来大法，故相娆恼，惟愿听我忏悔罪咎！汝于未来必定成就阿耨多罗三藐三菩提，愿见济度。’尔时，释提桓因及诸天众顶礼我足，于是辞去，忽然不见<sup>110</sup>。

“善男子，如我往昔，为半偈故，舍弃此身，以是因缘，便得超越足十二劫，在弥勒前成阿耨多罗三藐三菩提。善男子，我得如是无量功德，皆由供养如来正法。善男子，汝今亦尔，发阿耨多罗三藐三菩提心<sup>111</sup>，则已超过无量无边恒河沙等诸菩萨上。善男子，是名菩萨住于大乘大般涅槃修于圣行。

大般涅槃经卷第十三

<sup>110</sup> 大正藏：现

<sup>111</sup> 大正藏：发于阿耨多罗三藐三菩提心

# 大般涅槃经卷第十四

北凉天竺三藏昙无讖译 梵

宋沙门慧严慧观同谢灵运再治

## 梵行品第二十之一

“善男子，云何菩萨摩訶萨梵行？善男子，菩萨摩訶萨住于大乘大般涅槃，住七善法得具梵行。何等为七？一者，知法；二者，知义；三者，知时；四者，知足；五者，自知；六者，知众；七者，知尊卑。

“善男子，云何菩萨摩訶萨知法？善男子，是菩萨摩訶萨知十二部经，所谓修多罗<sup>112</sup>、祇夜、受<sup>113</sup>记、伽陀、优陀那、尼陀那、阿波陀那、伊帝目多伽、阇陀伽、毗佛略、阿浮陀达磨<sup>114</sup>、优波提舍。

“善男子，何等名为修多罗经？从‘如是我闻’乃至‘欢喜奉行’，如是一切名修多罗。

“何等名为祇夜经？佛告诸比丘：‘昔我与汝愚无智慧，不能如实见四真谛，是故流转，久

<sup>112</sup> 大正藏：谓修多罗

<sup>113</sup> 大正藏：授

<sup>114</sup> 大正藏：阿浮陀达摩

处生死，没大苦海。何等为四？苦、集、灭、道。’  
如佛昔日为诸比丘说契经竟，尔时，复有利根众生为听法故后至佛所，即便问人：‘如来向者为说何事？’佛时知己，即因本经以偈颂曰：

我昔与汝等 不见四真谛  
是故久流转 生死大苦海  
若能见四谛 则得断生死  
生死<sup>115</sup>既已尽 更不受诸有

“是名祇夜<sup>116</sup>。”

“何等名为受记经？如有经律，如来说时，为诸天人受佛记莇<sup>117</sup>：‘汝阿逸多，未来有王名曰僂<sup>118</sup>佉，当于是世而成佛道，号曰弥勒。’是名受记<sup>119</sup>。”

“何等名为伽陀经？除修多罗及诸戒律，其余有说四句之偈，所谓：

诸恶莫作 众<sup>120</sup>善奉行  
自净其意 是诸佛教

“是名伽陀<sup>121</sup>。”

<sup>115</sup> 大正藏：有

<sup>116</sup> 大正藏：是名祇夜经

<sup>117</sup> 大正藏：别

<sup>118</sup> 大正藏：僂

<sup>119</sup> 大正藏：是名授记经

<sup>120</sup> 大正藏：诸

<sup>121</sup> 大正藏：是名伽陀经

“何等名为优陀那经？如佛晡时，入于禅定，为诸天众广说法要。时，诸比丘各作是念：‘如来今者为何所作？’如来明旦从禅定起，无有人问，以他心智即自说言：‘比丘当知，一切诸天寿命极长。汝诸比丘！善哉！为他不求己利。善哉少欲！善哉知足！善哉寂静！’如是诸经无问自说，是名优陀那<sup>122</sup>。

“何等名为尼陀那经？如诸经偈所因根本为他演说。如舍卫国，有一丈夫，罗网捕鸟，得已笼系，随与水谷，而复还放。世尊知其本末因缘，而说偈言：

莫轻小恶 以为无殃  
水涸虽微 渐盈大器

“是名尼陀那<sup>123</sup>。

“何等名为阿波陀那经？如戒律中所说譬喻，是名阿波陀那<sup>124</sup>。

“何等名为伊帝目多伽经？如佛所说：‘比丘当知，我出世时，所可说者，名曰界<sup>125</sup>经；鸠留秦佛出世之时，名甘露鼓；拘那含牟尼佛时，

<sup>122</sup> 大正藏：是名优陀那经

<sup>123</sup> 大正藏：是名尼陀那经

<sup>124</sup> 大正藏：是名阿波陀那经

<sup>125</sup> 大正藏：契

名曰法镜；迦叶佛时，名曰分别空<sup>126</sup>。’ 是名伊帝目多伽<sup>127</sup>。

“何等名为阇陀伽经？如佛世尊，本为菩萨，修诸苦行，所谓：‘比丘当知，我于过去作鹿、作黑、作麀、作兔、作粟散王、转轮圣王、龙、金翅鸟。’ 诸如是等行菩萨道时所可受身，是名阇陀伽。

“何等名为毗佛略经？所谓大乘方等经典，其义广大犹如虚空，是名毗佛略。

“何等名为未曾有经？如彼菩萨，初出生时，无人扶持，即行七步，放大光明，遍照<sup>128</sup>十方。亦如猕猴，手捧蜜器，以献如来。如白项狗，佛边听法。如魔波旬，变为青牛，行瓦钵间，令诸瓦钵，互相振触，无所伤损。如佛初生，入天庙时，令彼天像，起下礼敬。如是等经，名未曾有<sup>129</sup>。

“何等名为优波提舍经？如佛世尊所说诸经，若作议论，分别广说，辨其相貌，是名优波提舍<sup>130</sup>。

<sup>126</sup> 大正藏：名分别空

<sup>127</sup> 大正藏：是名伊帝目多伽经

<sup>128</sup> 大正藏：观

<sup>129</sup> 大正藏：如是等经名未曾有经

<sup>130</sup> 大正藏：是名优波提舍经

“菩萨若能如是了知十二部经，名为知法。

“云何菩萨摩訶萨知义？菩萨摩訶萨若于一切文字语言广知其义，是名知义。

“云何菩萨摩訶萨知时？善男子，菩萨善知如是时中任修寂静，如是时中任修精进，如是时中任修舍定，如是时中任供养佛，如是时中任供养师，如是时中任修布施、持戒、忍辱、精进、禅定、具足般若波罗蜜，是名知时。

“云何菩萨摩訶萨知足？善男子，菩萨知足<sup>131</sup>，所谓饮食、衣、药、行、住、坐、卧、睡寤、语默，是名知足。

“善男子，云何菩萨摩訶萨自知？是菩萨自知我有如是信、如是戒、如是多闻、如是舍、如是慧、如是去来、如是正念、如是善行、如是问、如是答，是名自知。

“云何菩萨摩訶萨知众？善男子，是菩萨知如是等是刹利众、婆罗门众、居士众、沙门众，应于是众如是行来、如是坐起、如是说法、如是问答，是名知众。

“善男子，云何菩萨摩訶萨知人尊卑？善男子，人有二种：一者，信；二者，不信。菩萨当

<sup>131</sup> 大正藏：菩萨摩訶萨知足

知：信者是善；不信者<sup>132</sup>不名为善。复次，信有二种：一者，常往僧坊；二者，不往。菩萨当知：其往者善，其不往者不名为善。往僧坊者复有二种：一者，礼拜；二，不礼拜。菩萨当知：礼拜者善，不礼拜者不名为善。其礼拜者复有二种：一者，听法；二者，不听。菩萨当知：听法者善，不听法者不名为善。其听法者复有二种：一，至心听；二，不至心。菩萨当知：至心听者，是则名善；不至心者，不名为善。至心听法复有二种：一者，思义；二，不思义。菩萨当知：思义者善，不思义者不名为善。其思义者复有二种：一，如说行；二，不如说行。如说行者，是则为善；不如说行，不名为善。如说行者复有二种：一，求声闻，不能利安饶益一切苦恼众生；二者，回向无上大乘，利益多人，令得安乐。菩萨应知：能利多人得安乐者，最上最善。善男子，如诸宝中，如意宝珠最为胜妙；如诸味中，甘露最上；如是菩萨于人天中，最胜最上，不可譬喻。

“善男子，是名菩萨摩訶萨住于大乘大涅槃经住七善法。菩萨住是七善法已，得具梵行。

“复次，善男子，复有梵行，谓慈、悲、喜、

<sup>132</sup> 大正藏：其不信者

舍。”

迦叶菩薩白佛言：“世尊！若多修慈能斷瞋恚，修悲心者亦斷瞋恚，云何而言四無量心？推義而言，則應有三。世尊！慈有三緣：一，緣眾生；二，緣於法；三，則無緣。悲、喜、舍心亦復如是。若從是義，唯應有三<sup>133</sup>，不應有四。眾生緣者，緣於五陰，願與其樂，是名眾生緣。法緣者，緣諸眾生所須之物而施與之，是名法緣。無緣者，緣於如來，是名無緣。慈者多緣貧窮眾生，如來大師永離貧窮，受第一樂，若緣眾生則不緣佛；法亦如是。以是義故，緣如來者名曰無緣。

“世尊！慈之所緣一切眾生，如緣父母、妻子、親屬。以是義故，名眾生緣。法緣者，不見父母、妻子、親屬，見一切法皆從緣生，是名法緣。無緣者，不住法相及眾生相，是名無緣。悲、喜、舍心亦復如是，是故應三，不應有四。

“世尊！人有二種：一者，見行；二者，愛行。見行之人多修慈悲，愛行之人多修喜舍。是故應二，不應有四。

“世尊！夫無量者，名曰無邊。邊不可得，

<sup>133</sup> 大正藏：唯應有三；永樂北藏及龍藏：一

故名无量。若无量者则应是一，不应言四。若言四者，何得无量？是故应一，不应四也。”

佛告迦叶：“善男子，诸佛如来为诸众生所宣法要，其言秘密，难可了知。或为众生说一因缘，如说何等为一因缘？所谓一切有为之法。善男子，或说二种：因缘及果<sup>134</sup>。或说三种：烦恼、业、苦。或说四种：无明、诸行、生与老死。或说五种：所谓受、爱、取、有及生。或说六种：三世因果。或说七种：谓识、名色、六入、触、受及以爱、取。或说八种：除无明、行及生、老、死，其余八事。或说九种：如城经中除无明、行、识，其余九事。或说十一：如为萨遮尼犍<sup>135</sup>子说，除生一法，其余十一。或时，具说十二因缘，如王舍城为迦叶等具说十二，无明乃至生老病死。

“善男子，如一因缘，为众生故，种种分别，无量心法亦复如是。善男子，以是义故，于诸如来深秘行处，不应生疑。

“善男子，如来世尊有大方便：无常说常，常说无常；说乐为苦，说苦为乐；不净说净，净说不净；我说无我，无我说我；于非众生说为众

<sup>134</sup> 大正藏：因之与果

<sup>135</sup> 大正藏：犍

生，于实众生说非众生；非物说物，物说非物；非实说实，实说非实；非境说境，境说非境；非生说生，生说非生；乃至无明说明，明说无明；色说非色，非色说色；非道说道，道说非道。善男子，如来以是无量方便为调众生，岂虚妄耶？

“善男子，或有众生，贪于财货，我于其人自化其身作转轮王，于无量岁，随其所须，种种供给，然后教化，令其安住阿耨多罗三藐三菩提。若有众生，贪著五欲，于无量岁，以妙五欲，充满其愿<sup>136</sup>，然后劝化，令其安住阿耨多罗三藐三菩提。若有众生，荣豪自贵，我于其人无量岁中为作仆使，趋走给侍，得其心已，即复劝化，令其安住阿耨多罗三藐三菩提。若有众生，性戾<sup>137</sup>自是，须人呵谏，我于无量百千岁中，教诃敦喻，令心调顺<sup>138</sup>，然后复劝令其安住阿耨多罗三藐三菩提。善男子，如来如是于无量岁以种种方便，令诸众生安住阿耨多罗三藐三菩提，岂虚妄耶？诸佛如来，虽处众恶，无所染污，犹如莲华。

“善男子，应如是知四无量义。

“善男子，是无量心体性有四，若有修行，

<sup>136</sup> 大正藏：充足其情

<sup>137</sup> 大正藏：悻

<sup>138</sup> 大正藏：令其心调

生大梵处。善男子，如是无量，伴类<sup>139</sup>有四，是故名四。夫修慈者，能断贪欲；修悲心者，能断瞋恚；修喜心者，能断不乐；修舍心者，能断贪欲瞋恚众生。善男子，以是义故，得名为四，非一、二、三。

“善男子，如汝所言‘慈能断瞋，悲亦如是，应说三’者，汝今不应作如是难。何以故？善男子，恚有二种：一，能夺命；二，能鞭撻。修慈则能断彼夺命，修悲则能除彼鞭撻<sup>140</sup>。善男子，以是义故，岂非四耶？复次，瞋有二种：一，瞋众生；二，瞋非众生。修慈心者，断瞋众生；修悲心者，断瞋非众生。复次，瞋有二种：一，有因缘；二，无因缘。修慈心者，断有因缘；修悲心者，断无因缘。复次，瞋有二种：一，于过去久已积习<sup>141</sup>；二，于现在今始积习<sup>142</sup>。修慈心者能断过去；修悲心者，断于现在。复次，瞋有二种：一，瞋圣人；二，瞋凡夫。修慈心者，断瞋圣人；修悲心者，断瞋凡夫。复次，瞋有二种：一，上；二、中。修慈断上，修悲断中。

“善男子，以是义故，则名为四。何得难言

<sup>139</sup> 大正藏：侶

<sup>140</sup> 大正藏：修悲能除彼鞭撻者

<sup>141</sup> 大正藏：一者、久于过去修习

<sup>142</sup> 大正藏：二者、于今现在修习

应三非四？是故，迦叶，是无量心伴类<sup>143</sup>相对，分别为四。复以器故，应名为四。器若有慈，则不得有悲、喜、舍心。以是义故，应四无减。善男子，以行分别，故应有四。若行慈时，无悲、喜、舍，是故有四。

“善男子，以无量故，亦得名四。夫无量者，则有四种：有无量心，有缘非自在；有无量心，自在非缘；有无量心，亦缘亦自在；有无量心，非缘非自在。何等无量，有缘非自在？缘于无量无边众生而不能得自在三昧，虽得不定，或得或失。何等无量，自在非缘？如缘父母、兄弟、姊妹，欲令安乐，非无量缘。何等无量，亦缘亦自在？谓诸佛菩萨。何等无量，非缘非自在？声闻、缘觉不能广缘无量众生，亦非自在。善男子，以是义故，名四无量，非诸声闻、缘觉所知，乃是诸佛如来境界。善男子，如是四事，声闻、缘觉虽名无量，少不足言。诸佛菩萨乃得名为无量无量<sup>144</sup>。”

迦叶菩萨白佛言：“世尊！如是！如是！实如圣言<sup>145</sup>：‘诸佛如来所有境界非诸声闻、缘觉

<sup>143</sup> 大正藏：侶

<sup>144</sup> 大正藏：诸佛菩萨则得名为无量无边

<sup>145</sup> 大正藏：教

所及。’世尊！颇有菩萨，住于大乘大般涅槃，得慈悲心，非是大慈大悲心不？”

佛言：“有。善男子，菩萨若于诸众生中三品分别：一者，所亲<sup>146</sup>；二者，怨憎；三者，中人。于亲人中复作三品：谓上、中、下；怨憎亦尔。是菩萨摩訶萨，于上亲所<sup>147</sup>与增上乐；于中、下亲亦复平等与增上乐。于上怨所<sup>148</sup>，与少分乐；于中怨所，与中品乐；于下怨所<sup>149</sup>，与增上乐。菩萨如是转增修习，于上怨所<sup>150</sup>，与中品乐；于中、下怨，等与上乐<sup>151</sup>。转复修习，于上、中、下，等与上乐。若上怨所<sup>152</sup>与上乐者，尔时，得名慈心成就。菩萨尔时，于其父母<sup>153</sup>及上怨所<sup>154</sup>得平等心，无有差别。善男子，是名得慈，非大慈也。”

“世尊！何缘菩萨得如是慈，犹故不得名为大慈？”

“善男子，以成难故<sup>155</sup>，不名大慈。何以故？

<sup>146</sup> 大正藏：一者，亲人

<sup>147</sup> 大正藏：中

<sup>148</sup> 大正藏：中

<sup>149</sup> 大正藏：中

<sup>150</sup> 大正藏：中

<sup>151</sup> 大正藏：于中下怨等与增上乐

<sup>152</sup> 大正藏：中

<sup>153</sup> 大正藏：于父母所

<sup>154</sup> 大正藏：中

<sup>155</sup> 大正藏：以难成故

久于过去无量劫中，多集烦恼，未修善法，是故不能于一日中，调伏其心。善男子，譬如豌豆，干时锥刺终不可著。诸烦恼坚亦复如是<sup>156</sup>，虽一日夜系心不散，难可调伏。又如家犬，不畏于人；山林野鹿，见人怖走。瞋恚难去如守家狗，慈心易失如彼野鹿。是故，此心难可调伏。以是义故，不名大慈。

“复次，善男子，譬如画石，其文常在；画水速灭，势不久住。瞋恚难除，譬如画石；善根易灭，犹如画水<sup>157</sup>。是故此心，难可<sup>158</sup>调伏。如大火聚，其明久住；电光之明，不得暂停。瞋如火聚，慈如电明。是故，此心难得调伏。以是义故，不名大慈。

“善男子，菩萨摩訶萨住于初地，名曰大慈。何以故？善男子，最极恶者，名一阐提。初住菩萨修大慈时，于一阐提，心无差别，不见其过，故不生瞋。以是义故，得名大慈。

“善男子，为诸众生除无利益，是名大慈；欲与众生无量利乐，是名大悲；于诸众生心生欢喜，是名大喜；无所拥护，名为大舍。若不见我、

<sup>156</sup> 大正藏：烦恼坚硬亦复如是

<sup>157</sup> 大正藏：瞋如画石，诸善根本如彼画水

<sup>158</sup> 大正藏：得

法相、己身，见一切法平等无二，是名大舍。自舍己乐，施与他人，是名大舍。

“善男子，唯四无量能令菩萨增长具足六波罗蜜，其余诸行不必能尔。善男子，菩萨摩訶萨先得世间四无量心，然后乃发阿耨多罗三藐三菩提心，次第方得出世间者。善男子，因世无量得出世无量，以是义故，名大无量。”

迦叶菩萨白佛言：“世尊！除无利益、与利乐者，实无所为。如是思惟，即是虚观，无有实利。世尊，譬如比丘，观不净时，见所著衣，悉是皮想<sup>159</sup>，而实非皮；所可食啖<sup>160</sup>，皆作虫想<sup>161</sup>，而实非虫；观好美<sup>162</sup>羹，作秽<sup>163</sup>汁想，而实非秽<sup>164</sup>；观所食酪，犹如髓脑，而实非脑；观骨碎末<sup>165</sup>，犹如麩<sup>166</sup>想<sup>167</sup>，而实非麩<sup>168</sup>。四无量心亦复如是，不能真实利益众生，令其得乐，虽口发言与众生乐，而实不得。如是之观，非虚妄耶？

“世尊！若非虚妄、实与乐者，彼<sup>169</sup>诸众生，

<sup>159</sup> 大正藏：相

<sup>160</sup> 大正藏：噉

<sup>161</sup> 大正藏：相

<sup>162</sup> 大正藏：观大豆

<sup>163</sup> 大正藏：下

<sup>164</sup> 大正藏：粪

<sup>165</sup> 大正藏：末

<sup>166</sup> 大正藏：麩

<sup>167</sup> 大正藏：相

<sup>168</sup> 大正藏：麩

<sup>169</sup> 大正藏：而

何故不以诸佛菩萨威德力故，一切受乐？若当真实、不得乐者，如佛所说：‘我念往昔，唯<sup>170</sup>修慈心，经此劫世，七反<sup>171</sup>成坏，不来此生。世界成时，生梵天中；世界坏时，生光音天。若生梵天，力势自在，无能摧伏，于千梵中最胜最上，名大梵王。有诸众生，皆于我所，生最上想。三十六反<sup>172</sup>，作忉利王释提桓因。无量百千，作转轮王。’唯<sup>173</sup>修慈心乃得如是人天果报，若不实者，云何得与此义相应？”

佛言：“善哉！善哉！善男子，汝真勇猛，无所畏惧。”

即为迦叶而说偈言：

若于一众生 不生嗔<sup>174</sup>恚心  
而愿与彼乐 是名为慈善  
一切众生中 若起于悲心  
是名圣种性 得福报无量  
设使五通仙 悉满此大地  
有大自然主 奉施其所安  
象马种种物 所得福报果

<sup>170</sup> 大正藏：独

<sup>171</sup> 大正藏：返

<sup>172</sup> 大正藏：返

<sup>173</sup> 大正藏：独

<sup>174</sup> 大正藏：瞋

## 不及修一慈 十六分中一

“善男子，夫修慈者，实非妄想，谛是真实。若是声闻、缘觉之慈，是名虚妄；诸佛菩萨真实不虚。云何知耶？善男子，菩萨摩訶萨修行如是大涅槃者，观土为金，观金为土；地作水相，水作地相；水作火相，火作水相；地作风相，风作地相；随意成就，无有虚妄。观实众生为非众生，观非众生为实众生，悉随意成，无有虚妄。善男子，当知菩萨四无量心是实思惟，非不真实。

“复次，善男子，云何名为真实思惟？谓能断除诸烦恼故。善男子，夫修慈者，能断贪欲；修悲心者，能断瞋恚；修喜心者，能断不乐；修舍心者，能断贪恚及众生相。以是故名真实思惟。

“复次，善男子，菩萨摩訶萨四无量心能为一切诸善根本。善男子，菩萨摩訶萨若不得见贫穷众生，无缘生慈。若不生慈，则不能起惠施之心，以施因缘，令诸众生得安隐乐，所谓饮食<sup>175</sup>、车乘、衣服、华香、床卧、舍宅、灯明。如是施时，心无系缚，不生贪著，必定回向阿耨多罗三藐三菩提。其心尔时，无所依止，妄想永断，不为怖畏、名称、利养，不求人天所受快乐，不生

<sup>175</sup> 大正藏：所谓饮食

憍慢，不望反报，不为诳他<sup>176</sup>。故行布施，不求富贵。凡行施时，不见受者、持戒破戒、是田非田、此是知识此非知识。施时不见是器非器，不择日时、是处非处，亦复不计饥谨丰乐，不见因果、此是众生此非众生、是福非福。虽复不见施者、受者及以财物，乃至不见断及果报，而常行施，无有断绝。

“善男子，菩萨若见持戒、破戒乃至果报，终不能施。若不布施，则不具足檀波罗蜜。若不具足檀波罗蜜，则不能成阿耨多罗三藐三菩提。

“善男子，譬如有人，身被毒箭，其人眷属，欲令安隐，为除毒故，即命良医而为拔箭。彼人方言：‘且待！莫触！我今当观，如是毒箭从何方来？谁之所射？为是刹利？婆罗门？毗舍首陀？’复更作念：‘是何木耶？竹耶？柳耶？其镞铁者，何冶<sup>177</sup>所出？刚耶？柔耶？其毛羽者，是何鸟翼？乌、鸱<sup>178</sup>、鸢耶？所有毒者，为从作生？自然而有？为是人毒？恶<sup>179</sup>蛇毒耶？’如是痴人竟未能知，寻便命终。善男子，菩萨亦尔，若行施时，分别受者、持戒、破戒乃至果报，终

<sup>176</sup> 大正藏：不为他诳

<sup>177</sup> 大正藏：冶；永乐北藏：冶；龙藏：冶

<sup>178</sup> 大正藏：鸱

<sup>179</sup> 大正藏：为

不能施。若不能施，則不具足檀波羅蜜。若不具足檀波羅蜜，則不能成阿耨多羅三藐三菩提。

“復次，善男子<sup>180</sup>，菩薩摩訶薩行布施時，于諸眾生，慈心平等，猶如子想。又行施時，于諸眾生，起悲憫心，譬如父母瞻視病子。行施之時，其心歡喜，猶如父母見子病愈。既施之後，其心放舍，猶如父母見子長大，能自存活。是菩薩摩訶薩于慈心中布施食時，常作是愿：‘我今所施，悉与一切眾生共之。以是因緣，令諸眾生得大智食，勤進回向无上大乘。’

“‘愿諸眾生，得善智食，不求声聞、緣覺之食。’

“‘愿諸眾生，得法喜食，不求愛食。’

“‘愿諸眾生，悉得般若波羅蜜食，皆令充滿攝取无閔<sup>181</sup>增上善根。’

“‘愿諸眾生，解達空相<sup>182</sup>，得无閔身，犹如虚空。’

“‘愿諸眾生，常为受者怜悯一切，为众福田。’

“善男子，菩薩摩訶薩修慈心時，凡所施食，

<sup>180</sup> 大正藏：善男子；永乐北藏及龙藏：復次，善男子

<sup>181</sup> 大正藏：碍（后同）

<sup>182</sup> 大正藏：愿諸眾生悟解空相

应当坚发如是等愿。

“复次，善男子，菩萨摩訶萨于慈心中布施浆时，常<sup>183</sup>作是愿：‘我今所施，悉与一切众生共之。以是因缘，令诸众生趣大乘河，饮八味水，速履<sup>184</sup>无上菩提之道，离于声闻、缘觉枯竭，渴仰志求无上佛乘，断烦恼渴，渴仰法味，离生死爱，爱乐大乘大般涅槃，具足法身，得诸三昧，入于甚深智慧大海。’

“‘愿诸众生，得甘露味、菩提出世、离欲寂静如是诸味。’

“‘愿诸众生，具足无量百千法味；具法味已，得见佛性；见佛性已，能雨法雨；雨法雨已，佛性遍覆，犹如虚空。复令其余无量众生，得一法味，所谓大乘，非诸声闻、辟支佛味。’

“‘愿诸众生，得一甜味，无有六种差别之味。’

“‘愿诸众生，唯求法味，无阙佛法所行之味，不求余味。’

“善男子，菩萨摩訶萨于慈心中布施浆时，应当坚发如是等愿。

<sup>183</sup> 大正藏：当

<sup>184</sup> 大正藏：涉

“复次，善男子，菩萨摩訶萨于慈心中施车乘时，常<sup>185</sup>作是愿：‘我今所施，悉与一切众生共之。以是因缘，普令众生成于大乘、得住大乘、不退于乘、不动转乘、金刚座乘，不求声闻、辟支佛乘，向于佛乘、无能伏乘、无羸乏乘、不退没乘、无上乘、十力乘、大功德乘、未曾有乘、希有乘、难得乘、无边乘、知一切乘。’善男子，菩萨摩訶萨于慈心中施车乘时，常应如是坚发誓愿。

“复次，善男子，菩萨摩訶萨于慈心中布施衣时，常<sup>186</sup>作是愿：‘我今所施，悉与一切众生共之。以是因缘，令诸众生得惭愧衣，法界覆身裂诸见衣。衣服离身一尺六寸，得金色身，所受诸触柔软无阂，光色润泽，皮肤细软，常光无量，无色离色。’

“‘愿诸众生，皆悉普得无色之身，过一切色，得入无色大般涅槃。’

“善男子，菩萨摩訶萨布施衣时，应当如是坚发誓愿。

“复次，善男子，菩萨摩訶萨于修慈中布施

<sup>185</sup> 大正藏：应

<sup>186</sup> 大正藏：当

华香、涂香、栴香、诸杂香时，常<sup>187</sup>作是愿：‘我今所施，悉与一切众生共之。以是因缘，令诸众生，一切皆得佛华三昧，七觉妙鬘系其首顶。’

“‘愿诸众生，形如满月，所见诸色微妙第一。’

“‘愿诸众生，皆成一相，百福庄严。’

“‘愿诸众生，随意得见可意之色。’

“‘愿诸众生，常遇善友，得无阂香，离诸臭秽。’

“‘愿诸众生，具诸善根、无上珍宝。’

“‘愿诸众生，相视和悦，无有忧苦，咸备众善<sup>188</sup>，不相忧念。’

“‘愿诸众生，戒香具足。’

“‘愿诸众生，持无阂戒，香气芬<sup>189</sup>馥，充满十方。’

“‘愿诸众生，得坚牢戒、无悔之戒、一切智戒，离诸破戒，悉得无戒、未曾有戒、无师戒、无作戒、无秽戒、无污染戒<sup>190</sup>、竟已戒、究竟戒，平等戒<sup>191</sup>，涂割善恶等无憎爱<sup>192</sup>。’

187 大正藏：应

188 大正藏：众善各备

189 大正藏：馥

190 大正藏：无染污戒；永乐北藏及龙藏：无污染戒

191 大正藏：得平等戒

192 大正藏：于香涂身及以斫刺等无憎爱

“‘愿诸众生，得无上戒、大乘之戒，非小乘戒。’

“‘愿诸众生，悉得具足尸波罗蜜，犹如诸佛所成就戒。’

“‘愿诸众生，悉为布施、持戒、忍辱、精进、禅、智之所熏修。’

“‘愿诸众生，悉得成就<sup>193</sup>大般涅槃微妙莲华，其华香气，充满十方。’

“‘愿令<sup>194</sup>众生，纯食大乘大般涅槃无上香膳，如蜂采华<sup>195</sup>，但取香味。’

“‘愿诸众生，悉得成就无量功德所熏之身。’

“善男子，菩萨摩訶萨于慈心中施华香时，常当坚发如是誓愿。

“复次，善男子，菩萨摩訶萨于慈心中施床敷时，常<sup>196</sup>作是愿：‘我今所施，悉与一切众生共之。以是因缘，令诸众生，得天中天所卧之床，得大智慧，坐四禅处。卧于菩萨所卧之床，不卧声闻、辟支佛床<sup>197</sup>。’

“‘愿诸众生，得安乐卧，离生死床，成大

<sup>193</sup> 大正藏：于

<sup>194</sup> 大正藏：诸

<sup>195</sup> 大正藏：...香馔，犹蜂采华

<sup>196</sup> 大正藏：应

<sup>197</sup> 大正藏：不卧声闻、辟支佛床，离卧恶床

涅槃师子卧床。’

“‘愿诸众生，坐此床已，复为其余无量众生，示现神通师子游戏。’

“‘愿诸众生，住此大乘大宫殿中，为诸众生演说佛性。’

“‘愿诸众生，坐无上床，不为世法之所降伏。’

“‘愿诸众生，得忍辱床，离于生死、饥馑、冻饿。’

“‘愿诸众生，得无畏床，永离一切烦恼怨贼。’

“‘愿诸众生，得清净床，专求无上正真之道。’

“‘愿诸众生，得善法床，常为善友之所拥护。’

“‘愿诸众生，得右胁卧床，依因诸佛所行之法。’

“善男子，菩萨摩訶萨于慈心中施床敷时，应当坚发如是誓愿。

“复次，善男子，菩萨摩訶萨于慈心中施舍宅时，当作是愿：‘我今所施，悉与一切众生共之。以是因缘，令诸众生，处大乘舍，修行善友

所行之行，修大悲行、六波罗蜜行、大正觉行、一切菩萨所行、道行、无边广大如虚空行。

“‘愿诸众生，皆得正念，远离恶念。’

“‘愿诸众生，悉得安住常、乐、我、净，永离四倒。’

“‘愿诸众生，悉皆受持出世文字。’

“‘愿诸众生，必为无上一切智器。’

“‘愿诸众生，悉皆得入甘露法舍<sup>198</sup>。’

“‘愿诸众生，初、中、后心常入大乘涅槃之<sup>199</sup>宅。’

“‘愿诸众生，于未来世，常处菩萨所居宫殿。’

“善男子，菩萨摩訶萨于慈心中施舍宅时，常当坚发如是誓愿。

“复次，善男子，菩萨摩訶萨于慈心中施灯明时，常<sup>200</sup>作是愿：‘我今所施，悉与一切众生共之。以是因缘，令诸众生，光明无量，安住佛法。’

“‘愿诸众生，常得照明。’

“‘愿诸众生，得色微妙，光泽第一。’

<sup>198</sup> 大正藏：悉得入于甘露屋宅

<sup>199</sup> 大正藏：屋

<sup>200</sup> 大正藏：当

“‘愿诸众生，其目清净，无诸翳网。’

“‘愿诸众生，得大智炬，善解无我、无众生相、无人、无命。’

“‘愿诸众生，皆得睹见清净佛性犹如虚空。’

“‘愿诸众生，肉眼清净，彻见十方恒沙世界。’

“‘愿诸众生，得佛光明，普照十方。’

“‘愿诸众生，得无阂明<sup>201</sup>，皆悉得见清净佛性。’

“‘愿诸众生，得大智明，破一切暗及一阐提。’

“‘愿诸众生，得无量光，普照无量诸佛世界。’

“‘愿诸众生，然大乘灯，离二乘锭<sup>202</sup>。’

“‘愿诸众生，所得光明灭无明暗，过逾千日<sup>203</sup>。’

“‘愿诸众生，得火珠明<sup>204</sup>，悉灭三千大千世界所有黑暗。’

“‘愿诸众生，具足五眼，悟诸法相，成无师觉。’

<sup>201</sup> 大正藏：眼

<sup>202</sup> 大正藏：灯

<sup>203</sup> 大正藏：过于千日并照之功

<sup>204</sup> 大正藏：得大光明

“‘愿诸众生，无见无明。’

“‘愿诸众生，悉得大乘大般涅槃微妙光明，示悟众生真实佛性。’

“善男子，菩萨摩訶萨于慈心中施灯明时，常应坚<sup>205</sup>发如是誓愿。

“善男子，一切声闻、缘觉、菩萨、诸佛如来所有善根，慈为根本。善男子，菩萨摩訶萨修习慈心，能生如是无量善根，所谓不净、出息入息、无常、生灭，四念处、七方便、三观处、十二因缘、无我<sup>206</sup>等观，暖法、顶法、忍法、世第一法，见道、修道、正勤、如意、诸根、诸力、七菩提分、八道、四禅、四无量心、八解脱、八胜处、十一切入，空无相愿、无诤三昧，知他心智及诸神通、知本际智、声闻智、缘觉智、菩萨智、佛智。善男子，如是等法，慈为根本。善男子，以是义故，慈是真实，非虚妄也。若有人问：‘谁是一切诸善根本？’当言：‘慈是。’以是义故，实非虚妄<sup>207</sup>。

“善男子，能为善者，名实思惟；实思惟者，即名为慈。慈即如来，慈即大乘，大乘即慈，慈

<sup>205</sup> 大正藏：勤

<sup>206</sup> 大正藏：我；永乐北藏及龙藏：常

<sup>207</sup> 大正藏：以是义故，慈是真实非虚妄也

即如來。

“善男子，慈即菩提道，菩提道即如來，如來即慈。

“善男子，慈即大梵，大梵即慈，慈即如來。

“善男子，慈者，能為一切眾生而作父母。父母即慈，慈即如來。

“善男子，慈者乃是不可思議諸佛境界，不可思議諸佛境界即是慈也。當知慈者，即是如來。

“善男子，慈者即是眾生佛性，如是佛性久為煩惱之所覆蔽，故令眾生不得睹見。佛性即慈，慈即如來。

“善男子，慈即大空，大空即慈，慈即如來。

“善男子，慈即虛空，虛空即慈，慈即如來。

“善男子，慈即是常，常即是法，法即是僧，僧即是慈，慈即如來。

“善男子，慈即是樂，樂即是法，法即是僧，僧即是慈，慈即如來。

“善男子，慈即是淨，淨即是法，法即是僧，僧即是慈，慈即如來。

“善男子，慈即是我，我即是法，法即是僧，僧即是慈，慈即如來。

“善男子，慈即甘露，甘露即慈。慈即佛性，

佛性即法，法即是僧，僧即是慈，慈即如來。

“善男子，慈者，即是一切菩薩無上之道，道即是慈，慈即如來。

“善男子，慈者，即是諸佛世尊無量境界，無量境界即是慈也。當知是慈即是如來。

“善男子，慈若無常，無常即慈，當知是慈是聲聞慈。

“善男子，慈若是苦，苦即是慈，當知是慈是聲聞慈。

“善男子，慈若不淨，不淨即慈，當知是慈是聲聞慈。

“善男子，慈若無我，無我即慈，當知是慈是聲聞慈。

“善男子，慈若妄想、妄想即慈，當知是慈是聲聞慈。

“善男子，慈若不名檀波羅蜜，非檀之慈，當知是慈是聲聞慈；乃至般若波羅蜜亦復如是。

“善男子，慈若不能利益眾生，如是之慈是聲聞慈。

“善男子，慈若不入一相之道，當知是慈是聲聞慈。

“善男子，慈若不能覺了諸法，當知是慈是

声闻慈。

“善男子，慈若不能见如来性，当知是慈是声闻慈。

“善男子，慈若见法悉是有相，当知是慈是声闻慈。

“善男子，慈若有漏，有漏慈者是声闻慈。

“善男子，慈若有为，有为之慈是声闻慈。

“善男子，慈若不能住于初住，非初住慈，当知即是声闻之慈<sup>208</sup>。

“善男子，慈若不能得佛十力、四无所畏，当知是慈是声闻慈。

“善男子，慈若能得四沙门果，当知是慈是声闻慈<sup>209</sup>。

“善男子，慈若有无、非有非无，如是之慈非诸声闻、辟支佛等所能思议。善男子，慈若不可思议，法不可思议，佛性不可思议，如来亦不可思议。

“善男子，菩萨摩訶萨住于大乘大般涅槃修如是慈，虽复安于睡眠之中而不睡眠，勤精进故；虽常觉寤<sup>210</sup>，亦无觉寤<sup>211</sup>，以无眠故；于睡眠中，

<sup>208</sup> 大正藏：声闻慈也

<sup>209</sup> 大正藏：当知是慈是声闻慈也

<sup>210</sup> 大正藏：悟

<sup>211</sup> 大正藏：悟

诸天虽护，亦无护者，不行恶故；眠不恶梦，无有不善，离睡眠故；命终之后，虽生梵天，亦无所生，得自在故。善男子，夫修慈者，能得成就如是无量无边功德。

“善男子，是大涅槃微妙经典，亦能成就如是无量无边功德，诸佛如来亦得成就如是无量无边功德。”

迦叶菩萨白佛言：“世尊！菩萨摩訶萨所有思惟悉是真实，声闻、缘觉非真实者，一切众生何故不以菩萨威力等受快乐？若诸众生实不得乐，当知菩萨所修慈心为无利益。”

佛言：“善男子，菩萨之慈非不利益。善男子，有诸众生，或必受苦，或有不受。若有众生必受苦者，菩萨之慈为无利益，谓一阐提。若有受苦不必定者，菩萨之慈则为利益，令彼众生悉受快乐。

“善男子，譬如有人，遥见师子、虎、豹、豺狼、罗刹鬼等，自然生怖，夜行见杙，亦生恐<sup>212</sup>畏。善男子，如是诸人自然怖畏，众生如是，见修慈者，自然受乐。善男子，以是义故，菩萨修慈是实思惟，非无利益。

<sup>212</sup> 大正藏：怖

“善男子，我说是慈有无量门，所谓神通。善男子，如提婆达教阿阇世欲害如来，是时，我入王舍大城次第乞食，阿阇世王即放护财狂醉之象，欲令害我及诸弟子。其象尔时，蹋杀无量百千众生。众生死已，多有血气，是象嗅已，狂醉倍常，见我翼从，被服赤色，谓呼是血，而复见趣。我弟子中，未离欲者，四散<sup>213</sup>驰走，唯除阿难。尔时，王舍城中<sup>214</sup>，一切人民同时举声号哭流泪<sup>215</sup>，作如是言：‘怪哉！如来今日终<sup>216</sup>没，如何正觉一旦散坏？’是时，调达心生欢喜：‘瞿昙沙门灭没甚善！从今已往真是不现，快哉此计！我愿得遂。’

“善男子，我于尔时，为欲降伏护财象故，即入慈定，舒手示之，即于五指出五师子。是象见已，其心怖畏，失大小便<sup>217</sup>，举身投地，敬礼我足。善男子，我时手指，实无师子<sup>218</sup>，乃是修慈善根力故，令彼调伏。

“复次，善男子，我欲涅槃，始初发足向拘尸那城，有五百力士，于其中路，平治扫洒。中有

<sup>213</sup> 大正藏：怖

<sup>214</sup> 大正藏：王舍大城之中

<sup>215</sup> 大正藏：举声啼哭号泣

<sup>216</sup> 大正藏：灭

<sup>217</sup> 大正藏：其心怖畏，寻即失粪

<sup>218</sup> 大正藏：善男子，我于尔时，手五指头实无师子

一石，众欲举移<sup>219</sup>，尽力不能。我时怜悯，即起慈心。彼诸力士，寻即见我以足拇<sup>220</sup>指举此大石，掷置虚空，还以手接，安置右掌，吹令碎糝，复还合之<sup>221</sup>，令彼力士，贡高心息，即为略说种种法要，令其俱发阿耨多罗三藐三菩提心。善男子，如来尔时，实不以指举此大石在虚空中，还置右掌，吹令碎糝，复合如本。善男子，当知即是慈善根力，令诸力士见如是事。

“复次，善男子，此南天竺有一大城，名首波罗。于是城中，有一长者，名曰卢至，为众导主，已于过去无量佛所，植<sup>222</sup>诸善本。善男子，彼大城中，一切人民信伏邪道，奉事尼乾<sup>223</sup>。我时，欲度彼长者故，从王舍城至彼城邑。其间相去<sup>224</sup>六十五由旬，佛与大众步行而往<sup>225</sup>，为欲化度彼诸人故。尼捷闻我欲至彼城<sup>226</sup>，即作是念：

‘沙门瞿昙若至此者，此诸人民，便当舍我，不复供给<sup>227</sup>。我等穷悴，如何存活<sup>228</sup>？’诸尼捷<sup>229</sup>辈

<sup>219</sup> 大正藏：弃

<sup>220</sup> 大正藏：母

<sup>221</sup> 大正藏：复还聚合

<sup>222</sup> 大正藏：殖

<sup>223</sup> 大正藏：捷

<sup>224</sup> 大正藏：其路中间相去

<sup>225</sup> 大正藏：...六十五由旬由旬，步涉而往

<sup>226</sup> 大正藏：彼众尼捷闻我欲至首波罗城

<sup>227</sup> 大正藏：更不供给

<sup>228</sup> 大正藏：我等穷悴，奈何自活

<sup>229</sup> 大正藏：捷

各各分布<sup>230</sup>，告彼城人：‘沙门瞿昙今欲来此，然诸<sup>231</sup>沙门，委弃父母，东西驰骋，所至之处，能令土地，五谷不登<sup>232</sup>，人民饥馑，死亡者众，病瘦相寻，无可救解。瞿昙无赖，纯将诸恶罗刹鬼神以为侍从，无父、无母、孤穷之人而就<sup>233</sup>咨启为作门徒，所可教诏，纯说虚空，随其至处，初无安乐。’彼人闻已，即怀怖畏，头面敬礼尼捷<sup>234</sup>子足，白言：‘大师！我等今者，当设何计？’尼捷<sup>235</sup>答言：‘沙门瞿昙性好丛林、流泉、清水，外设有者，宜应毁<sup>236</sup>坏。汝等便可相与出城，斩伐林木，勿令有遗<sup>237</sup>，流泉、井、池填以臭秽<sup>238</sup>。坚闭城门，各严器仗，当壁防护，勤自固守。彼设来者，莫令得前。若不前者，汝当安隐。我等亦当作种种术，令彼瞿昙复道还去。’彼诸人民闻是语已，敬奉<sup>239</sup>施行，斩伐树木，污辱诸水，庄严器仗，牢自防护。

“善男子，我于尔时，至彼城已，不见一切

<sup>230</sup> 大正藏：散

<sup>231</sup> 大正藏：彼

<sup>232</sup> 大正藏：谷米不登

<sup>233</sup> 大正藏：来

<sup>234</sup> 大正藏：捷

<sup>235</sup> 大正藏：捷

<sup>236</sup> 大正藏：破

<sup>237</sup> 大正藏：...相与出城，诸有之处斫伐令尽，莫使有遗

<sup>238</sup> 大正藏：流泉、井、池悉置粪尸

<sup>239</sup> 大正藏：诺

树木丛林，唯见诸人庄严器仗，当壁自守。见是事已，寻生怜悯，慈心向之，所有树木，还生如本，复更生长，其余诸树不可称计。河池、井泉<sup>240</sup>其水清净，盈满其中如青琉璃，生众杂华弥覆其上，变其城壁为绀琉璃。城内人民悉得彻见我及大众，门自开辟，无能制者，所严器仗变成杂华。卢至长者而为上首，与其人民，俱共相随，来至我所<sup>241</sup>。我即为说种种法要，令彼诸人一切皆发阿耨多罗三藐三菩提心。

“善男子，我于尔时，实不化作种种树木、清净流水盈满河池、变其本城为绀琉璃、令彼人民彻见我身开其城门<sup>242</sup>、器仗为华。善男子，当知皆是慈善根力，能令彼人，见如是事。

“复次，善男子，舍卫城有婆罗门女<sup>243</sup>，名<sup>244</sup>婆私咤，唯有一子，爱之甚重，遇病命终。尔时，女人愁毒入心，狂乱失性，裸身无耻，游行四衢，啼哭失声，唱言：‘子子！汝何处去？’周遍城邑，无有休<sup>245</sup>已。而是女人，已于先佛，植众德本。善男子，我于是女起慈悯心。是时，

<sup>240</sup> 大正藏：泉井

<sup>241</sup> 大正藏：往至佛所

<sup>242</sup> 大正藏：令彼人民彻见于我开其城门

<sup>243</sup> 大正藏：舍卫城中有婆罗门女

<sup>244</sup> 大正藏：姓

<sup>245</sup> 大正藏：疲

女人即得见我，便生子想，还得本心，前抱我身如爱子法。我时，即告侍者阿难：‘汝可持衣与是女人。’既与衣已，便为种种说诸法要。是女闻法欢喜踊跃，发阿耨多罗三藐三菩提心。

“善男子，我于尔时，实非彼子，彼非我母，亦无抱持。善男子，当知皆是慈善根力，令彼女人，见如是事。

“复次，善男子，波罗奈<sup>246</sup>城有优婆夷，名摩诃斯那达多<sup>247</sup>，已于过去无量先佛种诸善根。是优婆夷，夏九十日屈请众僧<sup>248</sup>，奉施医药。是时，众中有一比丘，身婴重病，良医诊之，当须肉药。若得肉者，病则可除；若不得肉，命将不全。时，优婆夷闻医此言，寻持黄金，遍至市里，唱如是言：‘谁有肉卖？吾欲买之<sup>249</sup>。若有肉者，当等与金。’周遍城市，悉<sup>250</sup>不能得。是优婆夷寻自取刀，割其股<sup>251</sup>肉，切以为羹<sup>252</sup>，下种种香，施<sup>253</sup>病比丘。比丘服已，病即得差。是优婆夷患疮苦恼，不能堪忍，即发声言：‘南无佛陀！南

<sup>246</sup> 大正藏：捺

<sup>247</sup> 大正藏：字曰摩诃斯那达多

<sup>248</sup> 大正藏：九十日请命众僧

<sup>249</sup> 大正藏：吾以金买

<sup>250</sup> 大正藏：求

<sup>251</sup> 大正藏：髀

<sup>252</sup> 大正藏：臄

<sup>253</sup> 大正藏：送

无佛陀!’我于尔时，在舍卫城，闻其音声，于是女人起大慈心。是女寻见我持良药涂其疮上，还复<sup>254</sup>如本。我即为说<sup>255</sup>种种妙<sup>256</sup>法，闻法欢喜，发阿耨多罗三藐三菩提心。

“善男子，我于尔时，实不往至波罗奈<sup>257</sup>城，持药涂彼<sup>258</sup>优婆夷身<sup>259</sup>。善男子，当知皆是慈善根力，令彼女人，见如是事。

“复次，善男子，调达恶人贪不知足，多服酥故，头痛腹满，受大苦恼，不能堪忍。发如是言：‘南无佛陀！南无佛陀！’我时，住在优禅尼城，闻其音声，即生慈心。尔时，调达寻便见我往<sup>260</sup>至其所，手摩头腹，授与盐汤而令服之，服已平复。

“善男子，我实不往提<sup>261</sup>婆达所摩其头腹，授汤令服。善男子，当知皆是慈善根力，令提<sup>262</sup>婆达，见如是事。

“复次，善男子，憍萨罗国有诸群贼，其数五百，群党抄劫，为害滋甚。波斯匿王患其纵暴，

<sup>254</sup> 大正藏：合

<sup>255</sup> 大正藏：其

<sup>256</sup> 大正藏：说

<sup>257</sup> 大正藏：捺

<sup>258</sup> 大正藏：是

<sup>259</sup> 大正藏：疮

<sup>260</sup> 大正藏：往；永乐北藏及龙藏：住

<sup>261</sup> 大正藏：调

<sup>262</sup> 大正藏：调

遣兵伺捕，得已挑眼<sup>263</sup>，逐<sup>264</sup>著黑暗丛林之下。是诸群贼，已于先佛，植众德本，既失目已，受大苦恼，各作是言：‘南无佛陀！南无佛陀！我等今者无有救护。’啼哭号咷。我时，住在祇洹精舍，闻其音声，即生慈心。时，有凉风吹香山中种种香药，满其眼眶，寻还得眼，如本不异。诸贼开眼，即见如来住立其前而为说法。贼闻法已，发阿耨多罗三藐三菩提心。

“善男子，我于尔时，实不作风吹香山中种种香药，住其人前而为说法。善男子，当知皆是慈善根力，令彼群贼，见如是事。

“复次，善男子，琉璃太子以愚痴故，废其父王，自立为主。复念宿嫌，多害释种，取万二千释种诸女，刑<sup>265</sup>劓耳鼻，断截手足，推之坑塹。时，诸女人身受苦恼，作如是言：‘南无佛陀！南无佛陀！我等今者，无有救护。’复大号咷。是诸女人，已于先佛种诸善根。我于尔时，在竹林中，闻其音声，即起慈心。诸女尔时，见我来至迦毗罗城，以水洗创<sup>266</sup>，以药涂<sup>267</sup>之，苦痛寻

<sup>263</sup> 大正藏：目

<sup>264</sup> 大正藏：遂

<sup>265</sup> 大正藏：刖

<sup>266</sup> 大正藏：疮

<sup>267</sup> 大正藏：傅

除，耳、鼻、手、足还复如本。我时即为略说法要，悉令俱发阿耨多罗三藐三菩提心，即于大爱道比丘尼所，如法出家<sup>268</sup>，受具足戒。

“善男子，如来尔时，实不往至迦毗罗城以水洗创<sup>269</sup>，药涂止苦<sup>270</sup>。善男子，当知皆是慈善根力，令彼女人，见<sup>271</sup>如是事。悲、喜之心亦复如是。

“善男子，以是义故，菩萨摩訶萨修慈思惟即是真实，非虚妄也。善男子，夫无量者，不可思议；菩萨所行，不可思议；诸佛所行，亦不可思议；是大乘典大涅槃经，亦不可思议。

大般涅槃经卷第十四

<sup>268</sup> 大正藏：即于大爱道比丘尼所出家

<sup>269</sup> 大正藏：疮

<sup>270</sup> 大正藏：傅药止苦

<sup>271</sup> 大正藏：得

# 大般涅槃经卷第十五

北凉天竺三藏昙无讖译 梵

宋沙门慧严慧观同谢灵运再治

## 梵行品第二十之二<sup>272</sup>

“复次，善男子，菩萨摩訶萨修慈、悲、喜已，得住极爱一子之地。善男子，云何此<sup>273</sup>地名曰极爱，复名一子？善男子，譬如父母，见子安隐，心大欢喜。菩萨摩訶萨住是地中，亦复如是，视诸众生，同于一子，见修善者，生大欢喜。是故，此地名曰极爱。

“善男子，譬如父母，见子遇患，心生苦恼，恼之愁毒，初无舍离。菩萨摩訶萨住是地中，亦复如是，见诸众生为烦恼病之所缠切，心生愁恼，忧念如子，身诸毛孔血皆流出。是故，此地名为一子。

“善男子，如人小时，拾取土块、秽物<sup>274</sup>、瓦石、枯骨、木枝置于口中，父母见已，恐为其患，左手捉头，右手挑出。菩萨摩訶萨住是地中，

<sup>272</sup> 大正藏：梵行品之二

<sup>273</sup> 大正藏：是

<sup>274</sup> 大正藏：粪秽；永乐北藏及龙藏：秽物

亦复如是，见诸众生法身未增，或行身、口、意业不善，菩萨见已，则以智手拔之令出，不欲令彼流转生死，受诸苦恼。是故，此地复名一子。

“善男子，譬如父母，所爱之子舍而终亡，父母愁恼，愿与并命。菩萨亦尔，见一阐提堕于地狱，亦愿与俱生地狱中。何以故？是一阐提若受苦时，或生一念改悔之心，我即当为说种种法，令彼得生一念善根。是故，此地复名一子。

“善男子，譬如父母，唯有一子，其子睡寤、行住、坐卧，心常念之，若有罪咎，善言诱喻<sup>275</sup>，不加其恶。菩萨摩訶萨亦复如是，见诸众生，若堕地狱、畜生、饿鬼、或人天中，造作善恶，心常念之，初不舍；若行诸恶，终不生瞋，以恶加之。是故，此地复名一子。”

迦叶菩萨白佛言：“世尊！如佛所说，其言秘密，我今智浅，云何能解？若诸菩萨住一子地能如是者，云何如来昔为国王行菩萨道时，断绝尔所婆罗门命？若得此地，则应护念；若不得者，复何因缘不堕地狱？若使等视一切众生同于子想，如罗睺罗，何故复向提婆达多说如是言：‘痴

<sup>275</sup> 大正藏：谕

人无羞，食人洩<sup>276</sup>唾。’令彼闻已，生于瞋恨，起不善心，出佛身血。提婆达多造是恶已，如来复记当堕地狱一劫受罪。世尊！如是之言云何于义不相违背？世尊！须菩提者，住虚空地，凡欲入城求乞饮食要先观人。若有于己生嫌疑心，则止不行；乃至极饥，犹不行乞。何以故？是须菩提常作是念：‘我忆往昔，于福田所生一恶念，由是因缘，堕大地狱，受种种苦。我今宁饥，终日不食，终不令彼于我起嫌，堕于地狱受诸苦恼<sup>277</sup>。’复作是念：‘若有众生，嫌我立者，我当终日端坐不起；若有众生，嫌我坐者，我当终日立不移处；行、卧亦尔。’是须菩提，护众生故，尚起是心，何况菩萨？菩萨若得一子地者，何缘如来出是粗言，使诸众生起重恶心？”

佛告迦叶：“汝今不应作<sup>278</sup>如是难，言：‘佛如来为诸众生作烦恼因缘。’善男子，假使蚊嘴能尽海底，如来终不为诸众生作烦恼因缘。”

“善男子，假令大地悉为非色，水为坚<sup>279</sup>相，火为冷相，风为住相，三宝佛性及以虚空作无常相，如来终不为诸众生作烦恼因缘。”

<sup>276</sup> 大正藏：涕

<sup>277</sup> 大正藏：堕于地狱受苦恼也；永乐北藏及龙藏：堕于地狱受诸苦恼

<sup>278</sup> 大正藏：善男子，汝今不应作；永乐北藏及龙藏：佛告迦叶：“汝今不应作

<sup>279</sup> 大正藏：干

“善男子，假使毁犯四重禁罪及一阐提谤正法者，现身得成十力、无畏、三十二相、八十种好，如来终不为诸众生作烦恼因缘。

“善男子，假使声闻、辟支佛等，常住不变，如来终不为诸众生作烦恼因缘。

“善男子，假使十住诸菩萨等犯四重禁、作一阐提诽谤正法，如来终不为诸众生作烦恼因缘。

“善男子，假使一切无量众生断<sup>280</sup>灭佛性，如来究竟入般涅槃，如来终不为诸众生作烦恼因缘。

“善男子，假令<sup>281</sup>掷羴能系缚风，齿能破铁，爪坏须弥，如来终不为诸众生作烦恼因缘。

“宁与毒蛇同共一处，内其两手饿师子口，佉陀罗炭用洗浴身，不应发言：‘如来世尊为诸众生作烦恼因缘。’

“善男子，如来真实，能为众生断除烦恼，终不为作烦恼因缘<sup>282</sup>。

“善男子，如汝所言‘如来往昔杀婆罗门’者，善男子，菩萨摩訶萨乃至蚊子尚不故杀，况婆罗门？菩萨常作种种方便，惠施众生无量寿命。

<sup>280</sup> 大正藏：丧

<sup>281</sup> 大正藏：使

<sup>282</sup> 大正藏：烦恼因也；永乐北藏及龙藏：烦恼因缘

“善男子，夫施食者，则为施命。菩萨摩訶萨行檀波罗蜜时，常施众生无量寿命。

“善男子，修不杀戒，得寿命长。菩萨摩訶萨行尸波罗蜜时，则为施与一切众生无量寿命。善男子，慎口无过，得寿命长。菩萨摩訶萨行麤提波罗蜜时，常劝众生莫生怨想，推直于人，引曲向己，无所争<sup>283</sup>讼，得寿命长。是故，菩萨行麤提波罗蜜时，已施众生无量寿命。

“善男子，精勤修善，得寿命长。菩萨摩訶萨行毗梨耶波罗蜜时，常劝众生，勤修善法，众生行已，得无量寿<sup>284</sup>。是故，菩萨行毗梨耶波罗蜜时，已施众生无量寿命。

“善男子，修摄心者，得寿命长。菩萨摩訶萨行禅波罗蜜时，劝诸众生修平等心，众生行已，得寿命长。是故，菩萨行禅波罗蜜时，已施众生无量寿命。

“善男子，于诸善法不放逸者，得寿命长。菩萨摩訶萨行般若波罗蜜时，劝诸众生于诸善法不生放逸，众生行已，以是因缘，得寿命长。是故，菩萨行般若波罗蜜时，已施众生无量寿命。

<sup>283</sup> 大正藏：诤

<sup>284</sup> 大正藏：得无量寿命

“善男子，以是义故，菩萨摩訶萨于诸众生终无夺命。

“善男子，汝向所问：‘杀婆罗门时，得是地不？’善男子，我时已得<sup>285</sup>，以爱念故断其命根，非恶心也。善男子，譬如父母，唯有一子，爱之甚重，犯官宪制。是时，父母以怖畏故，若摈若杀。虽复<sup>286</sup>摈杀，无有恶心。菩萨摩訶萨为护正法亦复如是，若有众生谤大乘者，即以鞭撻苦加治之，或夺其命，欲令改往，遵修善法。菩萨意常<sup>287</sup>作是思惟：‘以何因缘能令众生发起信心？随其方便，要当为之。’

“诸婆罗门命终之后，生阿鼻地狱，即<sup>288</sup>有三念：一者，自念：‘我从何处而来生此？’即自知从人道中来；二者，自念：‘我今所生为是何处？’即便自知是阿鼻狱；三者，自念：‘乘何业缘而来生此？’即便自知乘谤方等大乘经典，不信因缘，为国主所杀，而来生此。念是事已，即于大乘方等经典生信敬心。寻时命终，生甘露鼓如来世界，于彼寿命具足十劫。善男子，以是义故，我于往昔，乃与是人十劫寿命。

<sup>285</sup> 大正藏：时我已得；永乐北藏及龙藏：我时已得

<sup>286</sup> 大正藏：有

<sup>287</sup> 大正藏：菩萨常当；永乐北藏及龙藏：菩萨意常

<sup>288</sup> 大正藏：则

“云何名杀？善男子，若<sup>289</sup>人掘地、刈草、斫树、斩截死尸、骂詈、鞭撻，以是业缘，堕地狱不？”

迦叶菩萨白佛言：“世尊！如我解佛所说义者，应堕地狱。何以故？如佛昔为声闻说法：‘汝诸比丘，于诸草木，莫生恶心。何以故？一切众生，因恶心故，堕于<sup>290</sup>地狱。’”

尔时，佛赞迦叶菩萨：“善哉！善哉！如汝所说，应善受持。善男子，若因恶心堕地狱者，菩萨尔时，实无恶心。何以故？菩萨摩訶萨于一切众生乃至虫蚁，悉生怜悯利益心故。所以者何？善知因缘诸方便故，以方便力欲令众生种诸善根。善男子，以是义故，我于尔时，以善方便，虽夺其命，而非恶心。

“善男子，婆罗门法，若杀蚊子满足十车，无有罪报；蚊虻、蚤虱、猫子<sup>291</sup>、师子、虎狼、熊罴、诸恶虫兽，及余能为众生害者，杀满十车；鬼神罗刹、拘槃荼、迦罗、富单那、颠狂干枯诸鬼神等，能为众生作饶害者，斩<sup>292</sup>夺其命，悉无罪报。若杀恶人，则有罪报；杀已不悔，则堕饿

<sup>289</sup> 大正藏：有

<sup>290</sup> 大正藏：于

<sup>291</sup> 大正藏：狸

<sup>292</sup> 大正藏：有

鬼；若能忏悔，三日断食，其罪消灭，无有遗余。若害和尚及其父母<sup>293</sup>、女人及牛，无数千年在地狱中。

“善男子，佛及菩萨知杀有三，谓下、中、上。下者，蚊子乃至一切畜生，唯除菩萨示现生者。善男子，菩萨摩訶萨以愿因缘示受畜生，是名下杀。以下杀因缘堕于地狱、畜生、饿鬼，具受下苦。何以故？是诸畜生有微善根。是故，杀者具受罪报，是名下杀。

“中杀者，从凡夫人至阿那含，是名为中。以是业因，堕于地狱、畜生、饿鬼，具受中苦，是名中杀。

“上杀者，父母乃至阿罗汉、辟支佛、毕定菩萨，是名为上。以是业因<sup>294</sup>，堕于阿鼻大地狱中，具受上苦，是名上杀。

“善男子，若有能杀一阐提者，则不堕此三种杀中。善男子，彼诸婆罗门等，一切皆是一阐提也。譬如掘地、刈草、斫树、斩截死尸、骂詈、鞭挞，无有罪报；杀一阐提亦复如是，无有罪报。何以故？诸婆罗门乃至无有信等五法，是故，虽

<sup>293</sup> 大正藏：若杀和上，害其父母；永乐北藏及龙藏：若害和尚及其父母

<sup>294</sup> 大正藏：以是业因缘故；永乐北藏及龙藏：以是业因

杀不墮地獄。

“善男子，汝上<sup>295</sup>所言：‘如來何故罵提婆達多痴人食唾？’汝亦不應作如是難<sup>296</sup>。何以故？諸佛世尊凡所發言不可思議。善男子，或有實語為世所愛，非時非法，不為利益，如是之言我終不说。善男子，或復有言粗獷虛妄，非時非法，聞者不愛，不能利益，我亦不说。善男子，若有語言，虽復粗獷，真實不虛，是時是法，能為一切眾生利益，聞虽不悅，我要說之。何以故？諸佛世尊、應、正遍知知方便故。

“善男子，如我一時，游彼曠野<sup>297</sup>聚落丛樹。在其林下，有一鬼神，即名曠<sup>298</sup>野，純食肉血，多杀眾生，復于其聚，日食一人。善男子，我于爾時，為彼鬼神，廣說法要，然彼暴惡，愚痴無智，不受教法。我即化身為大力鬼，動其宮殿，令不安所。彼鬼于時，將其眷屬出其宮殿，欲來拒逆。鬼见我時，即失心念，惶怖躄地，迷悶斷絕，犹如死人。我以慈憫，手摩其身，即还起坐，作如是言：‘快哉！今日还得身命。是大神王具大威德，有慈憫心，赦我愆咎。’即于我所，生

<sup>295</sup> 大正藏：先

<sup>296</sup> 大正藏：問

<sup>297</sup> 大正藏：游彼曠野；永樂北藏及龍藏：游彼曠野

<sup>298</sup> 大正藏：曠

善信心。我即还复如来之身，复更为说种种法要，令彼鬼神受不杀戒。

“即于是日，旷野村中，有一长者，次应当死，村人已送付彼鬼神。鬼神得已，即以施我。我既受已，便为长者更立名字，名手长者。尔时，彼鬼即白我言：‘世尊！我及眷属，唯仰血肉，以自存活，今已受戒，当何资立<sup>299</sup>？’我即答言：‘从今当勅声闻弟子，随有修行佛法之处，悉当令其施汝饮食。’

“善男子，以是因缘，为诸比丘制如是戒：‘汝等从今，常当施彼旷野鬼食。若有住处，不能施者，当知是辈，非我弟子，即是天魔徒党眷属。’

“善男子，如来为欲调伏众生故，示如是种种方便，非故令彼生怖畏也。

“善男子，我亦以木打护法鬼。又于一时，在一山上，推羊头鬼，令堕山下。复于树头扑护猕猴鬼，令护财象见五师子，使金刚神怖萨遮尼捷<sup>300</sup>，亦以针刺箭毛鬼身。虽作如是，亦不令彼诸鬼神等有残灭者<sup>301</sup>，直欲令彼，安住正法故，

<sup>299</sup> 大正藏：今以戒故，当云何活；永乐北藏及龙藏：今已受戒，当何资立

<sup>300</sup> 大正藏：捷

<sup>301</sup> 大正藏：有灭没者；永乐北藏及龙藏：有残灭者

示如是种种方便。

“善男子，我于尔时，实不骂辱提婆达多。提婆达多亦不愚痴、食人涕唾，亦复不生<sup>302</sup>恶趣之中、阿鼻地狱受罪一劫，亦不坏僧、出佛身血，亦不违犯四重之罪、诽谤正法大乘经典，非一阐提，亦非声闻、辟支佛也。善男子，提婆达者<sup>303</sup>，实非声闻、缘觉境界，唯是诸佛之所知见。善男子，是故，汝今不应难言：‘如来何缘呵责<sup>304</sup>骂辱提婆达也<sup>305</sup>？’汝于诸佛所有境界，不应如是生于疑网。”

迦叶菩萨白佛言：“世尊！譬如甘蔗，数数煎煮，得种种味。我亦如是，从佛数闻，多得法味，所谓出家味、离欲味、寂灭味、道味。世尊！譬如真金，数数烧打、镕销<sup>306</sup>、炼治<sup>307</sup>，转更明净、调和、柔软，光色微妙，其价难量，然后乃为人天宝贵。世尊！如来亦尔，郑重咨问，则得闻见甚深之义，令深行者受持奉修，无量众生发阿耨多罗三藐三菩提心，然后为诸人天所宗恭敬供养。”

<sup>302</sup> 大正藏：亦不生于；永乐北藏及龙藏：亦复不生

<sup>303</sup> 大正藏：提婆达多者；永乐北藏及龙藏：提婆达者

<sup>304</sup> 大正藏：喷

<sup>305</sup> 大正藏：提婆达多；永乐北藏及龙藏：提婆达也

<sup>306</sup> 大正藏：融消；永乐北藏及龙藏：镕销

<sup>307</sup> 大正藏：冶

尔时，佛赞迦叶菩萨：“善哉！善哉！菩萨摩訶萨为欲利益诸众生故，咨启如来如是深义。善男子，以是义故，我随汝意，说大乘方等<sup>308</sup>甚深秘法，所谓极爱如一子地。”

迦叶菩萨白佛言：“世尊！若诸菩萨修慈、悲、喜得一子地者，修舍心时，复得何地？”

佛言：“善哉！善哉！善男子，汝善知时，知我欲说，汝则咨问。菩萨摩訶萨修舍心时，则得住于空平等地，如须菩提。善男子，菩萨摩訶萨住空平等地，则不见有父母、兄弟、姊妹、儿息、亲族、知识、怨亲<sup>309</sup>中人，乃至不见阴界诸入、众生、寿命。

“善男子，譬如虚空，无有父母、兄弟、妻子，乃至无有众生、寿命。一切诸法亦复如是，无有父母乃至寿命。菩萨摩訶萨见一切法亦复如是，其心平等，如彼虚空。何以故？善能修习诸空法故。”

迦叶菩萨白佛言：“世尊！云何名空？”

“善男子，空者，所谓内空、外空、内外空、有为空、无为空、无始空、性空、无所有空、第

<sup>308</sup> 大正藏：说于大乘方等；永乐北藏及龙藏：说大乘方等

<sup>309</sup> 大正藏：憎；永乐北藏及龙藏：亲

一义空、空空、大空。

“菩萨摩訶萨云何观于内空？是菩萨摩訶萨观内法空。是内法空，谓无父母、怨亲中人、众生、寿命、常乐我净、如来、法、僧、所有财物。是内法中虽有佛性，而是佛性非内非外。所以者何？佛性常住，无变易故。是名菩萨摩訶萨观于内空。

“外空者亦复如是，无有内法。内外空者亦复如是。

“善男子，唯有如来、法、僧、佛性不在二空。何以故？如是四法常、乐、我、净。是故，四法不名为空。是名内外俱空。

“善男子，有为空者，有为之法悉皆是空，所谓内空、外空、内外空、常乐我净空、众生、寿命、如来、法、僧、第一义空。是中佛性非有为法，是故佛性非有为法空。是名有为空。

“善男子，云何菩萨摩訶萨观无为空？是无为法悉皆是空，所谓无常<sup>310</sup>、苦、不净、无我、阴、界、入、众生、寿命相、有为、有漏、内法、外法。无为法中，佛等四法非有为非无为，性是善故非无为，性常住故非有为。是名菩萨观无为

<sup>310</sup> 大正藏：所谓无无常；永乐北藏及龙藏：所谓无常

空。

“云何菩萨摩訶萨观无始空？是菩萨摩訶萨见生死无始，皆悉空寂。所谓空者，常、乐、我、净皆悉空寂，无有变易，众生、寿命、三宝、佛性及无为法，是名菩萨观无始空。

“云何菩萨观于性空？是菩萨摩訶萨观一切法本性皆空，谓阴、界、入、常、无常、苦、乐、净、不净、我、无我，观如是等一切诸法不见本性，是名菩萨摩訶萨观于性空。

“云何菩萨摩訶萨观无所有空？如人无子，言舍宅空，毕竟观空无有亲爱。愚痴之人言诸方空，贫穷之人言一切空，如是所计或空或非空，菩萨观时，如贫穷人一切皆空，是名菩萨摩訶萨观无所有空。

“云何菩萨摩訶萨观第一义空？善男子，菩萨摩訶萨观第一义时，是眼生时，无所从来，及其灭时，去无所至，本无今有，已有还无，推其实性，无眼无主。如眼无性<sup>311</sup>，一切诸法亦复如是。何等名为第一义空？有业有报，不见作者，如是空法名第一义空。是名菩萨摩訶萨观第一义空。

<sup>311</sup> 大正藏：如眼；永乐北藏及龙藏：如眼无性

“云何菩萨摩訶萨观于空空？是空空中，乃是声闻、辟支佛等所迷没处。善男子，是有是无，是名空空；是是非是，是名空空。善男子，十住菩萨，尚于是中，通达少分，犹如微尘，况复余人？善男子，如是空空，亦不同于声闻所得空空三昧。是名菩萨观于空空。

“善男子，云何菩萨摩訶萨观于大空？善男子，言大空者，谓般若波罗蜜，是名大空。

“善男子，菩萨摩訶萨得如是空门，则得住于虚空等地。善男子，我今于是大众之中，说如是等诸空义时，有十恒河沙菩萨摩訶萨<sup>312</sup>，即得住于虚空等地。善男子，菩萨摩訶萨住是地已，于一切法中，无有滞阂<sup>313</sup>、系缚、拘执，心无迷闷。以是义故，名虚空等地。

“善男子，譬如虚空，于可爱色不生贪著，不爱色中，不生瞋恚。菩萨摩訶萨住是地中，亦复如是，于好、恶色心无贪恚。善男子，譬如虚空广大无对，悉能容受一切诸物<sup>314</sup>。菩萨摩訶萨住是地中，亦复如是，广大无对，悉能容受一切诸法。以是义故，复得名为虚空等地。

<sup>312</sup> 大正藏：有十恒河沙等菩萨摩訶萨

<sup>313</sup> 大正藏：碍

<sup>314</sup> 大正藏：法

“善男子，菩萨摩訶萨住是地中，于一切法亦见亦知。若行、若缘、若性、若相、若因、若缘、若众生心、若根、若禅定、若乘、若善知识、若持禁戒、若所施，如是等法一切知见。

“复次，善男子，菩萨摩訶萨住是地中，知而不见。云何为知？知自饿法、投渊赴火、自坠高岩、常翘一脚、五热炙身；常卧灰土、棘刺、编椽、树叶、恶草、牛粪之上；衣粗麻衣、冢间所弃、粪扫毳毼<sup>315</sup>、钦婆罗衣、麀鹿皮革、刍草衣裳；茹菜啖果<sup>316</sup>、藕根、油滓、牛粪、根果；若行乞食，限从一家，主若言无，即便舍去，设复还唤，终不回顾；不食盐肉五种牛味，常所饮服糠汁沸汤；受持牛戒、鸡狗<sup>317</sup>雉戒，以灰涂身、长发为相；以羊祠天<sup>318</sup>，先呪后杀；四月事火，七日服风；百千亿华供养诸天，诸所欲愿因此成就。如是等法，能为无上解脱因者，无有是处。是名为知。云何不见？菩萨摩訶萨不见一人行如是法得正解脱，是名不见。

“复次，善男子，菩萨摩訶萨亦见亦知。何等为见？见诸众生，行是邪法，必堕地狱，是名

<sup>315</sup> 大正藏：褐

<sup>316</sup> 大正藏：噉食；永乐北藏及龙藏：啖果

<sup>317</sup> 大正藏：狗鸡；永乐北藏及龙藏：鸡狗

<sup>318</sup> 大正藏：以羊祠时；永乐北藏及龙藏：以羊祠天

为见。云何为知？知诸众生，从地狱出，生于人中，若能修行檀波罗蜜，乃至具足诸波罗蜜，是人必能得入正解脱<sup>319</sup>，是名为知。

“复次，善男子，菩萨摩訶萨复有亦见亦知。云何为见？见常无常、苦乐、净不净、我无我，是名为见。云何为知？知诸如来定不毕竟入于涅槃，知如来身金刚无坏，非是烦恼所成就身、又非臭秽腐败之身，亦复能知一切众生悉有佛性，是名为知。

“复次，善男子，菩萨摩訶萨复有亦知亦见。云何为知？知是众生心信<sup>320</sup>成就，知是众生求于大乘；是人顺流，是人逆流，是人正住，知是众生已到彼岸。顺流者，谓凡夫人；逆流者，从须陀洹乃至缘觉；正住者，诸<sup>321</sup>菩萨等；到彼岸者，所谓如来、应供<sup>322</sup>、正遍知。是名为知。云何为见？菩萨摩訶萨住于大乘大涅槃典修梵行心，以净天眼见诸众生造身、口、意三业不善，堕于地狱、畜生、饿鬼；见诸众生修善业者，命终当生天上人中；见诸众生从闇入闇，有诸众生从闇入明，有诸众生从明入闇，有诸众生从明入明，是

<sup>319</sup> 大正藏：是人必得入正解脱

<sup>320</sup> 大正藏：众生信心；永乐北藏及龙藏：众生心信

<sup>321</sup> 大正藏：谓

<sup>322</sup> 大正藏：应；永乐北藏及龙藏：应供

名为见。

“复次，善男子，菩萨摩訶萨复有亦知亦见。菩萨摩訶萨知诸众生修身、修戒、修心、修慧，是人今世恶业成就，或因贪欲、瞋恚、愚痴，是业必应地狱受报；是人直以修身、修戒、修心、修慧，现世轻受，不堕地狱。云何是业能得现报？忏悔发露所有诸恶，既悔之后更不敢作。惭愧成就故，供养三宝故，常自呵责故，是人以是善业因缘，不堕地狱，现世受报，所谓头痛、目痛、腹痛、背痛、横罗死殃、呵责骂辱、鞭杖闭系、饥饿困苦，受如是等现世轻报。是名为知。云何为见？菩萨摩訶萨见如是人，不能修习身戒心慧，造少恶业，此业因缘应现受报。是人少恶，不能忏悔，不自呵责，不生惭愧，无有怖惧，是业增长，地狱受报。是名为见。

“复有知而不见。云何知而不见？知诸众生皆有佛性，为诸烦恼之所覆蔽不能得见，是名知而不见。

“复有知而少见。十住菩萨摩訶萨等知诸众生皆有佛性，见不明了，犹如闇夜所见不了。

“复有亦见亦知，所谓诸佛如来亦见亦知。

“复有亦见亦知、不见不知。亦见亦知者，

所谓世间文字、言语、男女、车乘、瓶瓮、舍宅、城邑、衣裳、饮食、山河、园林、众生、寿命，是名亦见亦知<sup>323</sup>。云何不见不知？圣人所有微密之语，无有男女乃至园林，是名不见不知。

“复有知而不见。知所惠施、知所供处、知于受者、知因果报，是名为知。云何不见？不见所施、供处、受者及以果报，是名不见。

“菩萨摩訶萨知有八种，即是如来五眼所知。”

迦叶菩萨白佛言：“世尊！菩萨摩訶萨能如是知，得何等利？”

佛言：“善男子，菩萨摩訶萨能如是知得四无阂：法无阂、义无阂、词<sup>324</sup>无阂、乐说无阂。法无阂者，知一切法及法名字。义无阂者，知一切法所有诸义，能随诸法所立名字而为作义。词无阂者，随字论、正音论、阐陀论、世辩论。乐说无阂者，所谓菩萨摩訶萨凡所演说无有障阂，不可动转，无所畏惧<sup>325</sup>，难可摧伏。善男子，是名菩萨能如是见知即得如是四无阂智。

“复次，善男子，法无阂者，菩萨摩訶萨遍

<sup>323</sup> 大正藏：亦知亦见；永乐北藏及龙藏：亦见亦知

<sup>324</sup> 大正藏：辞（下同）

<sup>325</sup> 大正藏：无所畏省；永乐北藏及龙藏：无所畏惧

知声闻、缘觉、菩萨、诸佛之法。义无阂者，乘虽有三，知其归一，终不谓有差别之相。词无阂者，菩萨摩訶萨于一法中，作种种名，经无量劫说不可尽。声闻、缘觉能作是说，无有是处。乐说无阂者，菩萨摩訶萨于无量劫，为诸众生演说诸法，若名若义，种种异说不可穷尽。

“复次，善男子，法无阂者，菩萨摩訶萨虽知诸法而不取著。义无阂者，菩萨摩訶萨虽知诸义而不取著<sup>326</sup>。词无阂者，菩萨摩訶萨虽知名字而亦不著<sup>327</sup>。乐说无阂者，菩萨摩訶萨虽知乐说如是最上而亦不著。何以故？善男子，若取著者，不名菩萨。”

迦叶菩萨复白佛言：“世尊！若不取著，则不知法；若知法者，则是取著；若知不著，则无所知。云何如来说言知法而不取著？”

佛言：“善男子，夫取著者，不名无阂；无所取著乃名无阂。善男子，是故一切诸菩萨等有取著者，则无无阂。若无无阂，不名菩萨，当知是人，名为凡夫。何故取著名为凡夫？一切凡夫取著于色，乃至著识。以著色故则生贪心，生贪

<sup>326</sup> 大正藏：而亦不著；永乐北藏及龙藏：而不取著

<sup>327</sup> 大正藏：亦不取著；永乐北藏及龙藏：而亦不著

心故为色系缚，乃至为识之所系缚。以系缚故，则不得免生、老、病、死、忧、悲、大苦、一切烦恼。是故，取著名为凡夫。以是义故，一切凡夫无四无阂。

“善男子，菩萨摩訶萨已于无量阿僧祇劫知见法相，以知见故，则知其义；以见法相及知义故，而于色中不生系著，乃至识中亦复如是。以不著故，菩萨于色不生贪心，乃至识中亦不生贪。以无贪故，则不为色之所系缚，乃至不为识之所缚。以不缚故，则能得脱<sup>328</sup>生、老、病、死、忧、悲、大苦、一切烦恼。以是义故，一切菩萨得四无阂。

“善男子，以是因缘，我为弟子十二部中说系著者名为魔缚，若不著者则脱魔缚。譬如世间有罪之人，为王所缚；无罪之人，王不能缚。菩萨摩訶萨亦复如是，有系著者，为魔所缚；无系著者，魔不能缚。以是义故，菩萨摩訶萨而无所著。

“复次，善男子，法无阂者，菩萨摩訶萨善知字持而不忘失。所谓持者，如地、如山、如眼、如云、如人、如母。一切诸法亦复如是。义无阂

<sup>328</sup> 大正藏：则得脱于；永乐北藏及龙藏：则能得脱

者，菩萨虽知诸法名字而不知义，得义无阂则知其<sup>329</sup>义。云何知义？谓地持者，如地普持一切众生及非众生，以是义故，名地为持。善男子，谓山持者，菩萨摩訶萨作是思惟：‘以何义故名山而为持<sup>330</sup>？山能持地，令无倾动，是故名持。何名眼持<sup>331</sup>？眼能持光，故名为持。何名云持<sup>332</sup>？云名龙气，龙气持水，故名为持<sup>333</sup>。何名人持<sup>334</sup>？人能持法及以非法，故名为持<sup>335</sup>。何名母持<sup>336</sup>？母能持子，故名为持<sup>337</sup>。’菩萨摩訶萨知一切法名字句义亦复如是。词无阂者，菩萨摩訶萨以种种词演说一义，亦无有义，犹如男女、舍宅、车乘、众生等名。何故无义？善男子，夫义者，乃是菩萨、诸佛境界；词者，凡夫境界。以知义故，得词无阂。乐说无阂者，菩萨摩訶萨知词知义，故于无量阿僧祇劫说词说义而不可尽，是名乐说无阂。

“善男子，菩萨<sup>338</sup>于无量无边阿僧祇劫修行

<sup>329</sup> 大正藏：于

<sup>330</sup> 大正藏：何故名山而为持耶；永乐北藏及龙藏：以何义故名山而为持

<sup>331</sup> 大正藏：何故复名眼为持耶；永乐北藏及龙藏：何名眼持

<sup>332</sup> 大正藏：何故复名云为持耶；永乐北藏及龙藏：何名云持

<sup>333</sup> 大正藏：故名云持；永乐北藏及龙藏：故名为持

<sup>334</sup> 大正藏：何故复名人为持耶；永乐北藏及龙藏：何名人持

<sup>335</sup> 大正藏：故名人持；永乐北藏及龙藏：故名为持

<sup>336</sup> 大正藏：何故复名母为持耶；永乐北藏及龙藏：何名母持

<sup>337</sup> 大正藏：故名母持；永乐北藏及龙藏：故名为持

<sup>338</sup> 大正藏：菩萨摩訶萨；永乐北藏及龙藏：菩萨

世谛，以修行故，知法无阂。复于无量阿僧祇劫修第一义谛故，得义无阂。亦于无量阿僧祇劫，习毗伽罗论<sup>339</sup>故，得词无阂。亦于无量阿僧祇劫修习说世辩<sup>340</sup>论故，得乐说无阂。

“善男子，声闻、缘觉若有得是四无阂者，无有是处。善男子，九部经中，我说声闻、缘觉之人有四无阂，声闻、缘觉真实无有。何以故？菩萨摩訶萨为度众生故，修如是四无阂智。缘觉之人修寂灭法，志乐独处，若化众生，但现神通，终日默然，无所宣说，云何当有四无阂智？何故默然而无所说？缘觉不能说法度人，令得煖法<sup>341</sup>、顶法、忍法、世第一法、须陀洹、斯陀含、阿那含、阿罗汉、辟支佛、菩萨摩訶萨，不能令人发阿耨多罗三藐三菩提心。何以故？善男子，缘觉出世，世间无有九部经典，是故缘觉无词无阂、乐说无阂。

“善男子，缘觉之人虽知诸法，无法无阂。何以故？法无阂者，名为知字。缘觉之人虽知文字，无字无阂。何以故？不知常住二字故<sup>342</sup>，是故缘觉不得法无阂。虽知于义，无义无阂。真知

<sup>339</sup> 大正藏：毗伽罗那论；永乐北藏及龙藏：毗伽罗论

<sup>340</sup> 大正藏：谛

<sup>341</sup> 大正藏：使得暖法；永乐北藏及龙藏：令得煖法

<sup>342</sup> 大正藏：不知常住二字法故；永乐北藏及龙藏：不知常住二字故

义者，知诸众生悉有佛性。佛性义者，名为阿耨多罗三藐三菩提。以是义故，缘觉之人不得义无阂。是故，缘觉一切无有四无阂智。

“云何声闻无四无阂？声闻之人无有三种善巧方便。何等为三？一者，必须软语，然后受法；二者，必须粗语，然后受化；三者，不软不粗，然后受化。声闻之人无此三故，无四无阂。

“复次，声闻、缘觉不能毕竟知词、知义，无自在智知于境界，无有十力、四无所畏，不能毕竟度彼十二因缘大海<sup>343</sup>，不能善知众生诸根利钝差别，未能永断二谛疑心，不知众生种种诸心所缘境界，不能善说第一义空，是故二乘无四无阂。”

迦叶菩萨白佛言：“世尊！若诸声闻、缘觉之人一切无有四无阂者，云何世尊说舍利弗智慧第一，大目犍<sup>344</sup>连神通第一，摩诃拘絺罗四无阂第一？若<sup>345</sup>其无者，如来何故作如是说？”

尔时，世尊赞迦叶言：“善哉！善哉！善男子，譬如恒河有无量水，辛头大河水亦无量，博叉大河水亦无量，私<sup>346</sup>陀大河水亦无量，阿耨达

<sup>343</sup> 大正藏：不能毕竟渡于十二因缘大河

<sup>344</sup> 大正藏：犍

<sup>345</sup> 大正藏：如

<sup>346</sup> 大正藏：悉

池水亦无量，大海之中水亦无量，如是诸水虽同无量，然其多少其实不等。声闻、缘觉及诸菩萨四无碍智亦复如是。善男子，若说等者，无有是处。善男子，我为凡夫说摩诃拘絺罗四无碍智为最第一，汝所问者，其义如是。善男子，声闻之人或有得一，或有得二，若具足四，无有是处。”

迦叶<sup>347</sup>白佛言：“世尊！如佛上<sup>348</sup>说梵行品中，菩萨知见得四无碍者，菩萨知见则无所得，亦无心言无所得。世尊！是菩萨摩诃萨实无所得。若使菩萨心有得者，则非菩萨，名为凡夫。云何如来说言菩萨而有所得？”

佛言：“善男子，善哉！善哉！我将欲说而汝复问。善男子，菩萨摩诃萨实无所得。无所得者名四无碍。善男子，以何义故，无所得者名为无碍？若有得者，则名为碍；有障碍者，名四颠倒。善男子，菩萨摩诃萨无四倒故，故得无碍，是故菩萨名无所得。

“复次，善男子，无所得者则名为慧，菩萨摩诃萨得是慧，故名无所得。有所得者名为无明，菩萨永断无明闇故，故无所得。是故，菩萨名无

<sup>347</sup> 大正藏：迦叶菩萨；永乐北藏及龙藏：迦叶

<sup>348</sup> 大正藏：先

所得。

“复次，善男子，无所得者名大涅槃，菩萨摩訶萨安住如是大涅槃中，不见一切诸法性相，是故菩萨名无所得。有所得者名二十五有，菩萨永断二十五有，得大涅槃，是故菩萨名无所得。

“复次，善男子，无所得者名为大乘，菩萨摩訶萨不住诸法，故得大乘，是故菩萨名无所得。有所得者名为声闻、辟支佛道，菩萨永断二乘之道<sup>349</sup>故得佛道<sup>350</sup>，是故菩萨名无所得。

“复次，善男子，无所得者名方等经，菩萨读诵如是经故得大涅槃。是故，菩萨名无所得。有所得者名十一部经，菩萨不<sup>351</sup>修，纯说方等大乘经典，是故菩萨名无所得。

“复次，善男子，无所有者名为虚空。世间无物，名为虚空，菩萨得是虚空三昧无所见故，是故菩萨名无所得。有所得者名生死轮，一切凡夫轮回生死故有所见，菩萨永断一切生死，是故菩萨名无所得。

“复次，善男子，无所得者<sup>352</sup>名常、乐、我、净，菩萨摩訶萨见佛性故得常、乐、我、净，是

<sup>349</sup> 大正藏：二乘道；永乐北藏及龙藏：二乘之道

<sup>350</sup> 大正藏：得于佛道；永乐北藏及龙藏：得佛道

<sup>351</sup> 大正藏：所

<sup>352</sup> 大正藏：菩萨摩訶萨无所得者；永乐北藏及龙藏：无所得者

故菩萨名无所得。有所得者名无常、无乐、无我、无净，菩萨摩訶萨断是无常、无乐、无我、无净，是故菩萨名无所得。

“复次，善男子，无所得者名第一义空，菩萨摩訶萨观第一义空悉无所见，是故菩萨名无所得。有所得者名为五见，菩萨永断是五见故，得第一义空，是故菩萨名无所得。

“复次，善男子，无所得者名为阿耨多罗三藐三菩提，菩萨摩訶萨得阿耨多罗三藐三菩提时，悉无所见，是故菩萨名无所得。有所得者名声闻<sup>353</sup>、缘觉菩提，菩萨永断二乘菩提，是故菩萨名无所得。

“善男子，汝之所问亦无所得，我之所说亦无所得，若说有得，是魔眷属，非我弟子。”

迦叶<sup>354</sup>白佛言：“世尊！为我说是菩萨无所得时，无量众生断有相心，以是事故，我敢咨启无所得义，令如是等无量众生离魔眷属，为佛弟子。”

迦叶菩萨白佛言：“世尊！如来上为纯陀说偈<sup>355</sup>：

<sup>353</sup> 大正藏：名为声闻；永乐北藏及龙藏：名声闻

<sup>354</sup> 大正藏：迦叶菩萨；永乐北藏及龙藏：迦叶

<sup>355</sup> 大正藏：如来先于娑罗双树间，为纯陀说偈；永乐北藏及龙藏：如来上为纯陀说偈

本有今无 本无今有  
三世有法 无有是处

“世尊！是义云何？”

佛言：“善男子，我为化度诸众生故而作是说，亦为声闻、辟支佛故而作是说，亦为文殊师利法王子故而作是说，不但正为纯陀一人说是偈也。时，文殊师利将欲问我，我知其心而为说之。我既说已，文殊师利即得解了。”

迦叶菩萨言：“世尊！如文殊等，讵有几人能了是义？惟愿如来更为大众广分别说。”

“善男子，谛听！谛听！今当为汝重敷演之。言本有者，我昔本有无量烦恼；以烦恼故，现在无有大般涅槃。言本无者，本无般若波罗蜜；以无般若波罗蜜故，现在具有诸烦恼结。若有沙门、若婆罗门、若天、若魔、若梵、若人说言‘如来去、来、现在有烦恼’者，无有是处。

“复次，善男子，言本有者，我昔<sup>356</sup>本有父母和合之身，是故，现在无有金刚微妙之<sup>357</sup>身。言本无者，我身本无三十二相、八十种好；以本无有三十二相、八十种好故，现在具有四百四病。

<sup>356</sup> 大正藏：我；永乐北藏及龙藏：我昔

<sup>357</sup> 大正藏：法

若有沙门、若婆罗门、若天、若魔、若梵、若人说言‘如来去、来、现在有病苦’者，无有是处。

“复次，善男子，言本有者，我昔本有无常、无乐、无我<sup>358</sup>、无净；以有无常、无我、无乐、无净故，现在无有阿耨多罗三藐三菩提。言本无者，本不见佛性；以不见故，无常、乐、我、净。若有沙门、若婆罗门、若天、若魔、若梵、若人说言如来去、来、现在无常、乐、我、净’者，无有是处。

“复次，善男子，言本有者，本有凡夫修苦行心，谓得阿耨多罗三藐三菩提，以是事故，现在不能破坏四魔。言本无者，本无六波罗蜜<sup>359</sup>；以无六波罗蜜故<sup>360</sup>，修行凡夫苦行之心，谓得阿耨多罗三藐三菩提。若有沙门、若婆罗门、若天、若魔、若梵、若人说言‘如来去、来、现在有苦行’者，无有是处。

“复次，善男子，言本有者，我昔本有杂食之身，以有食身故<sup>361</sup>，现在无有无边之身。言本无者，本无三十七助道之法<sup>362</sup>，以无三十七助道

<sup>358</sup> 大正藏：无我、无乐；永乐北藏及龙藏：无乐、无我

<sup>359</sup> 大正藏：我本无有六波罗蜜；永乐北藏及龙藏：本无六波罗蜜

<sup>360</sup> 大正藏：以本无有六波罗蜜故；永乐北藏及龙藏：以无六波罗蜜故

<sup>361</sup> 大正藏：以食身故；永乐北藏及龙藏：以有食身故

<sup>362</sup> 大正藏：助道法；永乐北藏及龙藏：助道之法

法故，现在具有杂食之身。若有沙门、若婆罗门、若天、若魔、若梵、若人说言‘如来去、来、现在有杂食身’者，无有是处。

“复次，善男子，言本有者，我昔本有一切法中取著之心，以是事故，现在无有毕竟空定。言本无者，我本无有中道实义，以无中道真实义故，于一切法则有著心。若有沙门、若婆罗门、若天、若魔、若梵、若人说言‘如来去、来、现在说一切法是有相’者，无有是处。

“复次，善男子，言本有者，我初得阿耨多罗三藐三菩提时，有诸钝根声闻弟子，以有钝根声闻弟子故，不得演说一乘之实。言本无者，本无利根人中象王迦叶菩萨等，以无利根迦叶等故，随宜方便开示三乘。若有沙门、若婆罗门、若天、若魔、若梵、若人说言‘如来去、来、现在毕竟演说三乘法’者，无有是处。

“复次，善男子，言本有者，我本说言却后三月于娑罗双树当般涅槃，是故现在不得演说大方等典大般涅槃。言本无者，本昔无有文殊师利大菩萨等，以无有故，现在说言如来无常。若有沙门、若婆罗门、若天、若魔、若梵、若人说言‘如来去、来、现在是无常’者，无有是处。

“善男子，如来普为诸众生故，虽知诸法，说言不知；虽见诸法，说言不见；有相之法说言无相，无相之法说言有相；实有无常说言有常，实有有常说言无常，我、乐、净等亦复如是；三乘之法说言一乘，一乘之法随宜说三；略相说广，广相说略；四重之法说偷兰遮，偷兰遮法说为四重；犯说非犯，非犯说犯；轻罪说重，重罪说轻。何以故？如来明见众生根故。

“善男子，如来虽作是说，终无虚妄。何以故？虚妄之语即是罪过，如来悉断一切罪过，云何当有虚妄语耶？善男子，如来虽无虚妄之言，若知众生因虚妄说得法利者，随宜方便则为说之。

“善男子，一切世谛若于如来即是第一义谛。何以故？诸佛世尊为第一义故说于世谛，亦令众生得第一义谛。若使众生不得如是第一义谛者<sup>363</sup>，诸佛终不宣说世谛。

“善男子，如来有时演说世谛，众生谓佛说第一义谛；有时演说第一义谛，众生谓佛说于世谛。是则诸佛甚深境界，非是声闻、缘觉所知。善男子，是故汝先不应难言：‘菩萨摩訶萨无所得也。’菩萨常得第一义谛，云何难言无所得耶？”

<sup>363</sup> 大正藏：第一义者；永乐北藏及龙藏：第一义谛者

迦叶复言：“世尊！第一义谛亦名为道，亦名菩提，亦名涅槃。若有菩萨言有得道、菩提、涅槃，即是无常。何以故？法若常者，则不可得。犹如虚空，谁有得者？世尊！如世间物，本无今有，名为无常。道亦如是，道若可得，则名无常。法若常者，无得无生，犹如佛性，无得无生。世尊！夫道者，非色非不色，不长不短，非高非下，非生非灭，非赤非白、非青非黄，非有非无。云何如来说言可得？菩提、涅槃亦复如是。”

佛言：“如是，如是。善男子，道有二种：一者，常；二者，无常。菩提之相亦有二种：一者，常；二者，无常。涅槃亦尔。外道道者名为无常，内道道者名之为常。声闻、缘觉所有菩提名为无常，菩萨、诸佛所有菩提名之为常。外解脱者名为无常，内解脱者名之为常。善男子，道与菩提及以涅槃悉名为常，一切众生常为无量烦恼所覆，无慧眼故，不能得见。而诸众生为欲见故，修戒、定、慧；以修行故，见道、菩提及以涅槃。

“是名菩萨得道、菩提、涅槃<sup>364</sup>。”

“道之性相实不生灭。以是义故，不可捉持。”

<sup>364</sup> 大正藏：菩提及涅槃也；永乐北藏及龙藏：菩提、涅槃

“善男子，道者，虽无色像可见、称量可知，而实有用。善男子，如众生心，虽非是色，非长非短，非粗非细，非缚非解，非是见法而亦是有。以是义故，我为须达说言：‘长者，心为城主。若不护心<sup>365</sup>，则不护身、口；若护心者，则护身、口。以不善护是身、口故，令诸众生到三恶趣；护身、口者，则令众生得人天涅槃，得名真实；不得者<sup>366</sup>，名不真实。’

“善男子，道与菩提及以涅槃亦复如是，亦有亦常。若<sup>367</sup>其无者，云何能断一切烦恼？以其有故，一切菩萨了了见知。

“善男子，见有二种：一，相貌见；二，了了见。云何相貌见？如远见烟名为见火，实不见火，虽不见火亦非虚妄。见空中鹤便言见水，虽不见水亦非虚妄。如见华叶，便言见根，虽不见根亦非虚妄。如人遥见篱间牛角便言见牛，虽不见牛亦非虚妄。如见女人怀妊便言见欲，虽不见欲亦非虚妄。又如<sup>368</sup>见树生叶便言见水，虽不见水亦非虚妄。又如见云便言见雨，虽不见雨亦非虚妄。如见身业及以口业便言见心，虽不见心亦

<sup>365</sup> 大正藏：长者，若不护心；永乐北藏及龙藏：若不护心

<sup>366</sup> 大正藏：其不得者；永乐北藏及龙藏：不得者

<sup>367</sup> 大正藏：如

<sup>368</sup> 大正藏：如；永乐北藏及龙藏：又如

非虚妄。是名相貌见。

“云何了了见？如眼见色。善男子，如人眼根清净不坏，自观掌中阿摩勒果。菩萨了了见道<sup>369</sup>、菩提、涅槃亦复如是，虽如是见，初无见相。

“善男子，以是因缘，我于往昔告舍利弗：‘一切世间，若有沙门、若婆罗门、若天、若魔、若梵、若人，所不知、不见、不觉，唯<sup>370</sup>有如来悉知、见、觉，及诸菩萨亦复如是。舍利弗，若诸世间所知、见、觉，我与菩萨亦知、见、觉。世间众生之所不知、不见、不觉，亦不自知，不知见觉。世间众生所知、见、觉，便自说言：“我知、见、觉。”舍利弗，如来一切悉知、见、觉，亦不自言：“我知、见、觉。”一切菩萨亦复如是。何以故？若使如来作知、见、觉相，当知是则非佛世尊，名为凡夫，菩萨亦尔。’”

大般涅槃经卷第十五

<sup>369</sup> 大正藏：菩萨摩訶萨了了见道；永乐北藏及龙藏：菩萨了了见道

<sup>370</sup> 大正藏：惟

## ● 结诵仪

### 补阙真言

(三遍)

南無喝啰怛那. 哆罗夜耶. 佉啰佉啰. 俱住俱住. 摩啰摩啰. 虎啰. 吽. 贺贺. 苏怛拿. 吽. 泼抹拿. 娑婆诃.

南無佛 南無法 南無僧 (合掌三称)

南無一切如来、应、正等觉 (合掌三称)

南無本师释迦牟尼佛 (合掌三称)

南無大般涅槃经 (合掌三称)

### 发愿文

(一遍)

志心忏悔。我(某甲)与一切众生，从无始来，迷失真心，流转生死，六根罪障，无量无边，圆妙佛乘，无以开解，一切所愿，不得现前。我今读诵大般涅槃经，以此善根，发露黑恶，过、现、

未来三业所造无边重罪，皆得消灭，身心清净，惑障蠲除，福智庄严，净因增长，自他行愿速得圆成。愿诸如来常在说法，所有功德起随喜心，回向菩提，证常乐果。命终之日，正念现前，面见弥陀及诸圣众，一刹那顷，生莲华中。普愿众生，俱成佛道。

## 回向偈

(一遍)

诵经功德殊胜行 无边胜福皆回向  
普愿沉溺诸有情 速往无量光佛刹  
十方三世一切佛 一切菩萨摩訶萨  
摩訶般若波罗蜜

## 回向偈

(一遍)

愿以此功德 庄严佛净土  
上报四重恩 下济三途苦  
若有见闻者 悉发菩提心  
尽此一报身 同生极乐国

## 三皈依

(一遍)

自皈依佛，当愿众生，体解大道，发无上心。  
自皈依法，当愿众生，深入经藏，智慧如海。自  
皈依僧，当愿众生，统理大众，一切无碍，和南  
圣众。



此咒置经书中可灭误跨之罪

南无护法韦驮尊天菩萨

